



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



Über dieses Buch

Dies ist ein digitales Exemplar eines Buches, das seit Generationen in den Regalen der Bibliotheken aufbewahrt wurde, bevor es von Google im Rahmen eines Projekts, mit dem die Bücher dieser Welt online verfügbar gemacht werden sollen, sorgfältig gescannt wurde.

Das Buch hat das Urheberrecht überdauert und kann nun öffentlich zugänglich gemacht werden. Ein öffentlich zugängliches Buch ist ein Buch, das niemals Urheberrechten unterlag oder bei dem die Schutzfrist des Urheberrechts abgelaufen ist. Ob ein Buch öffentlich zugänglich ist, kann von Land zu Land unterschiedlich sein. Öffentlich zugängliche Bücher sind unser Tor zur Vergangenheit und stellen ein geschichtliches, kulturelles und wissenschaftliches Vermögen dar, das häufig nur schwierig zu entdecken ist.

Gebrauchsspuren, Anmerkungen und andere Randbemerkungen, die im Originalband enthalten sind, finden sich auch in dieser Datei – eine Erinnerung an die lange Reise, die das Buch vom Verleger zu einer Bibliothek und weiter zu Ihnen hinter sich gebracht hat.

Nutzungsrichtlinien

Google ist stolz, mit Bibliotheken in partnerschaftlicher Zusammenarbeit öffentlich zugängliches Material zu digitalisieren und einer breiten Masse zugänglich zu machen. Öffentlich zugängliche Bücher gehören der Öffentlichkeit, und wir sind nur ihre Hüter. Nichtsdestotrotz ist diese Arbeit kostspielig. Um diese Ressource weiterhin zur Verfügung stellen zu können, haben wir Schritte unternommen, um den Missbrauch durch kommerzielle Parteien zu verhindern. Dazu gehören technische Einschränkungen für automatisierte Abfragen.

Wir bitten Sie um Einhaltung folgender Richtlinien:

- + *Nutzung der Dateien zu nichtkommerziellen Zwecken* Wir haben Google Buchsuche für Endanwender konzipiert und möchten, dass Sie diese Dateien nur für persönliche, nichtkommerzielle Zwecke verwenden.
- + *Keine automatisierten Abfragen* Senden Sie keine automatisierten Abfragen irgendwelcher Art an das Google-System. Wenn Sie Recherchen über maschinelle Übersetzung, optische Zeichenerkennung oder andere Bereiche durchführen, in denen der Zugang zu Text in großen Mengen nützlich ist, wenden Sie sich bitte an uns. Wir fördern die Nutzung des öffentlich zugänglichen Materials für diese Zwecke und können Ihnen unter Umständen helfen.
- + *Beibehaltung von Google-Markenelementen* Das "Wasserzeichen" von Google, das Sie in jeder Datei finden, ist wichtig zur Information über dieses Projekt und hilft den Anwendern weiteres Material über Google Buchsuche zu finden. Bitte entfernen Sie das Wasserzeichen nicht.
- + *Bewegen Sie sich innerhalb der Legalität* Unabhängig von Ihrem Verwendungszweck müssen Sie sich Ihrer Verantwortung bewusst sein, sicherzustellen, dass Ihre Nutzung legal ist. Gehen Sie nicht davon aus, dass ein Buch, das nach unserem Dafürhalten für Nutzer in den USA öffentlich zugänglich ist, auch für Nutzer in anderen Ländern öffentlich zugänglich ist. Ob ein Buch noch dem Urheberrecht unterliegt, ist von Land zu Land verschieden. Wir können keine Beratung leisten, ob eine bestimmte Nutzung eines bestimmten Buches gesetzlich zulässig ist. Gehen Sie nicht davon aus, dass das Erscheinen eines Buchs in Google Buchsuche bedeutet, dass es in jeder Form und überall auf der Welt verwendet werden kann. Eine Urheberrechtsverletzung kann schwerwiegende Folgen haben.

Über Google Buchsuche

Das Ziel von Google besteht darin, die weltweiten Informationen zu organisieren und allgemein nutzbar und zugänglich zu machen. Google Buchsuche hilft Lesern dabei, die Bücher dieser Welt zu entdecken, und unterstützt Autoren und Verleger dabei, neue Zielgruppen zu erreichen. Den gesamten Buchtext können Sie im Internet unter <http://books.google.com> durchsuchen.



Guillaume (Chanson de geste)

LA CHANCUN DE WILLAME

a

89479

OCT 24 1905

X39W

.G935

W

Lait v' ont deginz lu
 taillie & de forz ois
 De deramed nufreus
 a ara znuus.
 Quel p't guerre uous
 l'ouy m'e empur
 q'ar dan William la
 p't n's lui ficeur
 t'at el ois el larchamp p'ent ouir
 q'at sonet se q'at a la g'e panen
 sip di deset homes les meillurs
 z q'm ne boi da' v'men le fuz
 p' q' il out t'at d'as al q' g'nt dolur
 l'inet di al neque

Ormal comere la chanca d'William
 cu deramed il's illi de cordes
 En ylate mer on ad mise la flore
 Amund grande ori' ueni par force
 Entred q'si mal des amored
 les marchez gaste le alus amored
 le uers colouz p'at p' force del regne
 le bon cheualz enuene en chones
 z en larchap z hui fait cest damage
 vn cheual z effort de ces paes homes
 il le muue ated balt de surges

e uilate mer on ad mise la flore
 a munt grande en z ueni p' force
 e munt t're z q' si mal desonored
 l'et marchez gaste le alus ueni p' force
 l'et uers colouz p'at p' force del regne
 t'et cheualz en uene en chones
 p' este rebalt q' paus net amement
 f' m'che mefine d'ist rebalt q' foring
 t' d'ist h'message iat si i combatung
 t' d'ibalt demande q' foring fire v'men
 p' ist uers q' ne frum el q' ben
 q' re tedd. d'ist v'men li ben
 v' etet amte z si etet mlt honde
 p' el meillurs homes del uage de mer
 q' m'en creez ne ferral ia blame
 p' ren tel messager fin tel amig mander
 q' obhez mie v'ille al curus
 q' ager hom z mlt en batille chapel
 l'la set ben maine mlt z barden
 q' il v'ient q' uenit r'ma deramed
 el respecter tedd. co d'ist estur m
Eucote t're al regne d'arriue paen y ambre
 q' mandent v'ille le mar chas
 q' de tel homes i m'enet v'mt mil
 v' ienge v'ill z des m'en m' art q' cine

Plaist vus oir de granz batailles & de forz esturs
 De Deramed uns reis sarazinurs
 Cum il prist guere uers Lowis nostre empereur
 Mais dan Willame la prist uers lui forcur
 Tant quil ocist el larchamp par grant onur
 Mais souent se combati a la gent paienur
 Si perdi de ses homes les meillurs
 & sun nevv dan Viuien le pruz
 Pur qui il out tut tens al quor grant dolor
 Lunesdi al uestre
 Oimas comence la chancun de Willame
Beis Deramed il est issu de cordres
 En halte mer en ad mise la flote
 A mund girunde en est uenu par force
 Entred que si mal des cunorted
 Les marchez gaste les alues comence a prendre
 Les ueirs corseinz porte par force del regne
 Les bons cheualers enmeine en chaenes
 & en larchamp est hui fait cest damages
 Un cheualer est estoers de ces paens homes
 Cil le nuncie a Tedbalt de burges
 Iloecins ert Tedbald ai celes hures
 Li messagers le trouad ueirement a burges
 & Esturmi sis nies & dan Viuien le cunte
 Od els .vii. cent cheualers de iofnes homes

Ni out cil qui nout halberc & broine
 Es vus le mes qui les noueles cunte
Tedbald le cunte reperout de uespres
 & sun nevou Esturmi quil adestre
 & Viuien i fu li bon nies Willame
 & od lui .vii.c. cheualers de sa tere
 Tedbald i ert si iure que plus ni poet estre
 & Esturmi sun nevou que par le poig la destre
 Es vus les mes qui cunte les noueles
 Deu salt Tedbalt al repeirer de uespres
 De Deramed vus di dures noueles
 En larchamp est un mult dolente guere
Beis Deramed est issu de cordres
 En halte mer en ad mise sa flote
 A munt girunde en est uenu par force
 En vostre tere est que si mal desonorted
 Les marchez guaste & les aluez uait prendre
 Les ueirs corsseinz trait par force del regne
 Tes cheualers enmeine en chaenes
 Pense Tebalt que paens nes ameinent
Eranche meisne dist Tebald que feruns
 Dist li messages ias nus i combatuns
 Tedbalt demande que feruns sire Viuien
 Dist li bers nus ne frum el que ben
 Sire Tedbalt dist Viuien li ber

Vus estes cunte & si estes mult honure
 Del meillurs homes de riuage de mer
 Si men creez ne serras ia blame
 Pren tes messages fai tes amis mander
 Nobliez mie Willame al curnies
 Sages hom est mult en bataille champel
 Il la set ben maintenir & garder
 Sil vient nus ueintrums Deramed
Qel te penser Tedbald co dist Esturmi
 En ceste terre al regne v que ariuent paen v arabit
 Si mandent Willame le marchis
 Si de tes homes i meinent vint mil
 Vienge Willame & des suens ni ait que cinc
 Treis v quatre que vienge a eschari
 Tu te combates & uenques arabiz
 Si dist hom co que dan Willame le fist
Qui ques prenge suens est tote voie le pris
 Cumbatun sire sis ueintrum io te pleuis
 Al pris Willame te poez faire tenir
 Franche meisne dist Viuien merci
 Od poi compaignie ne ueintrum pas arabiz
 Mandum nus seignurs pur Willame le marchis
 Sages hom est pur bataille tenir
 Sil i uient nus ueintrum arabiz
 & dist Esturmi malueis conseil ad ici

Estrange gent tant le loent tut dis
 & noz homes fait tuz tenir a uils
 Respunt Tedbald vnques pur el nel dist
 Mais a la bataille nose il pas uenir
Dist Viuiem ore auez vus mesdit
 Car il nen est nez ne de sa mere vis
 De ca la mer ne de la la rui
 Nen la crestiente uentre arabiz
 Mielz de mei ose grant bataille tenir
 Fors sul Willame al curtnies le marchis
 Il est mis vncles vers li ne men atis
 Lunsdi al vespre
 Io ne met mie apris Willame
Dunt dist Tedbald apportez mei le vin
 Si me donez si beuerai a Esturmi
 Ainz demain prime requerrum arrabiz
 De set liwes en orrat leui les criz
 Hanstes freindre & forz escuz croissir
 & li botillers lur aporta le vin
 But eut Tedbald sin donad a Esturmi
 & Viuiem sen alad a sun ostel dormir
Dunc sassemblerent les homes de lur terre
 Quant vint al albe dis mil sunt od helmes
 Par mein leuad Tedbald a unes estres
 De deuers le uent ourit une fenestre

Mirat le ciel ne pot mirer la terre
 Vit la couerte de broines & de helmes
 & de sarazins la pute gent aduerse
 Deus dist Tedbald ico que pot estre
Seignurs frans homes merci pur amur De
 Dis & vit anz ad ia & si sunt tuz passez
 Que primes oi abailler ceste cunte
 Vnc puis ne vi tanz cheualers armez
 Que ne seussent quele part turner
 Assaldrez vus ne chastel ne cite
 Dolent poent estre que vus auez defie
 & dolentes les marchez que vus deuez gaster
 Dist Viuien cest plaid soi io assez
 Tedbald fu iure erseir de sun vin cler
 Or est tut sage quant ad dormi assez
 Ore atendum nus Willame al curbnies
 Dunc out cil hunte qui al seir en out parlez
 & cil greignur qui se furent vante
Co dist Viuien le cheualer oneste
 Cest plaid soi io erseir par ma teste
 Tedbald ert iure al repeirer de vespres
 Ore ad assez dormi nus atendum Willames
 Este vus errant Esturmi par la presse
 Vint a Tebald sil prist par la main destre
 Ber ne te membre del repeirer de vespres

De Deramed & de la dure nouele
 Respunt Tedbald ai io mande Willame
 Nenil bels sire car il ne puet a tens estre
Qar mi le col ten oras herseir de he
 Si tu mandoues Willame al curbnies
 Respunt Tedbald ore leissum dunc ester
 Armes demande lem li vait a porter
 Dunc li vestent une broine mult bele & cler
 & vn vert healme li lacent en la teste
 Dunc ceint lespee le brant burni vers terre
 & vne grant targe tint par manuele
 Espe trenchant out en sa main destre
 & blanche enseigne li lancent tresque a tere
 Dunc li ameinent vn cheual de chastele
 Dunc munte Tedbald par sun estriv senestre
 Si en est issu par une des posternes
 Al dos le siwent .x.m. homes od helmes
 En larchamp vont rei Deramed requere
 Dunc sen issid Tedbalt de sa bone cite
 Al dos le siwent .x.m. homes armez
 En larchamp requistrent le païen Deramed
 Malueis seignur les ont a guier
 Lunsdi al vespre
 En larchamp uindrent de sur mer a destre
Tedbald garde es haltes eignes

De vint mil niefs i ad ven les uernes
 Co dist Tedbalt ore uei io lur herberges
 Dist Viuien no sunt car ne poent estre
 Nauries est qui aprisme uers terre
 Se cil sunt fors il purprendrunt herberge
 Dunc vint auant si choisid les festes
 De cinc cent triefs les pignuns & les herberges
 Dist Viuien co poent il ben estre
 Dist Tedbald de berri li maistres
 Viuien ber car muntez en cele tertre
 Si surveez i ceste gent aduerse
 Cum ben il vnt homes en mer & en terre
 Dist Viuien nel me deuez ia requere
 En cunte ual deibas porter mun healme
 De si qual champ v fiere od le poig destre
 Car si maprist li miens seignurs Willame
 Ia si Dev plaist ne suruerrai herberge
Sire Tedbalt dist Viuien le ber
 Tu es cunte & co mult honure
 Des meillurs homes de riuage de mer
 Munte le tertre tu deis ben esgarder
 Cum il vnt homes en terre & en mer
 Se tant as homes que tu i puisses fier
 Cheualche encontre si va od els iuster
 Ben les veintrum solunc la merci Dev
 b

& si poi as homes pur bataille champel
 Veez ci vn val fai les tuens assembler
 & pren tes messages fai tes amls mander
 Ni oblit mie Willame al curbnies
 Sages hom est mult en bataille champel
 Si la seet ben maintenir & gaber
 Sil vient nus veintrum Deramed
 Respunt Tedbald gent conseil mas done
 Le cheual broche si ad le tertre munte
 Garde Tedbald uers la lasse de mer
 Vit la couerte de barges & de nefz
 & de salandres & granz eschiez ferrez
 Mire le ciel ne pot terre esgarder
 De la pour sen est tut oblie
 A ual deualad del tertre v il ert munte
 Vint as franceis si lur ad tut cunte
Eranche meisne que purrum nus deuenir
 Cuntre vn des noz ad ben des lur mil
 Ki ore ne senfuit tost i purrad mort gisir
 Alum nus ent tost pur noz vies garir
Uiuien ber tentei lunc ceste roche
 Parmi cest val nus condui nostre force
 Que te ueit li sarazine flote
 Si enuerrai pur Willame qui combatera sil ose
 Lunsdi al vespre

Ia ne combaterai sanz Willame
Dist Viuien malueis conseil ad ci
 Tu les as ueuz & il tei altresì
 Si tu ten vas co ert tut del fuir
 Crestiente en ert tut dis plus vils
 & paenisme en ert le plus esbaldi
 Combat ten ber sis ueinterums iol te pleuis
 Al pris Willame te deis faire tenir
 Des herseir vespre le cunte en a atis
 Lunsdi al uespre
 Ben te deis faire tenir al pris Willame
Cent mille furent de la gent Deramed
 As esneckes & as dromunz de mer
 & virent sus el tertre ester
 Il le conurent al grant escu bocler
 Dunc sorent be quel val en out remis
 De ses homes mulz & de ses amis
Lunsdi al vespre
 Les sarazins de saraguce terre
 Cent mile furent de la pute geste
 Il ni out eelui de blanc halberc ne se ueste
 & de saraguce uerz healmes en lur testes
 Dor les fruntels & les flurs & les esses
 Espees ceintes les branz burniz uers terre
 Les bons escuz tindrent as manueles

Espees trenchanz & darz as poinz destres
 Cheuals coranz darabe suz lur seles
 Cil issirent fors al sablun & en la grauele
 Si purpristrent de fors la certaine terre
 Cil mourent al cunte Tedbald grant guere
 Pur co oirent doleruse nouele
Clers fu li iurz & bels li matins
 Li soleil raed si est li iurz esclariz
 Paen deualent par mi un broilled antif
 Parunt quil passent tote la terre fremist
 Des dur healmes quil vnt a or sartid
 Tres lur espalles tut li bois en reflambist
 Qui dunc les ueist esleisser & saillir
 De durs vassals li peust souenir
 I dunc les mustrat Viuien a Esturmi
Esturmi frere io uei paens uenant
 Le lur cheuals par sunt si coranz
 Pur .xv. liwes tuz iurz aler brochanz
 Pur plus cure ia ne lur batera flanc
 Aincui morrunt li cuart en larchamp
 Ore apresment li fueur de deuant
 Ia ne garrat li petit pur le grant
 Nem pot garir le pere sun enfant
 Fium nus en Dev le tut poant
 Car il est mieldre que tut li mescreant

Cumbatum nus si ueintrum ben le champ
Dunc dist Tedbald quen loez sire Viuien
 De la bataille car ore ia mem ben
 A prof demande quen loez Esturmi
 Que chascuns peust de sa uie garir
 Qui ore ne senfuit tost i puet mort gisir
 Alum nus ent pur noz uies garir
 Dist Viuien ore oi parler mastin
 Respunt Tedbald ainz pres de mun lin
 Ne uolt enquere dunt mun cors seit honi
 Ne engigneur malement bailli
Esturmi nies derump cest gunfanum
 Ke enfuiant ne nus conuisse lum
 Car al enseigne trarrunt paen felun
 & dist Esturmi a la Dev beneicun
 Encontre munt li gluz presenta sa hanste
 Sur sun arcum deuant mist la lance
 A ses dous poinz derump lenseigne blanche
 Puis la folad enz el fanc a ses pez
Tedbalt cunte teneit un grant espe
 Le resteot turnad contremunt uers le ciel
 & mist eu le fer sur larcum de tres
 Runt lenseigne del hanste de pomer
 Puis la fulat enz al fanc a ses pez
 Mielz uoil enseigne que flambe te arde del ciel 275

Quen bataille me reconuissent paen
 Gaimes noueles en dist li quons Viuiem
 En champ nus faillent nostre gunfanun
Hranche meisne que purrums deuenir
 En champ nus sunt nostre gunfanun failli
 Laisse nus vnt Tedbald & Esturmi
 Veez paens qui mult sunt pres dici
 Quant li nostre home i sunt v cinc v dis
 & li paen i sunt v cent v mil
 Dunc naurum nus qui nus puisse tenir
 Ne tel enseigne v puissum reuertir
 Genz sanz seignur sunt malement bailli
 Alez vus ent francs cheualers gentilz
 Car io ne puis endurer ne souffrir
 Tant gentil home seient a tort bailli
 Io me rendrai al dolerus peril
 Nen turnerai car a Dev lai pramis
 Qui ia ne fuierai pur pour de morir
 Fraunceis respudent or oez quil li vnt dit
Viuiem sire ia es tu de icel lin
 En grant bataille nus deis ben maintenir
 Ia fustes fiz Boeue cornebut al marchis
 Nez de la fille al bon cunte Aimeris
 Nefs Willame al curbnies le marchis
 En grant bataille nus deis ben maintenir

Veire seignurs de Dev cinc cenz merciz
 Mais dune chose i ad grant cuntredit
 Vus nestes meus ne io uostre sire ne deuinc
 Sanz tuz periures me purrez guerpier
 & cil respunent tuz a un cri
 Tais ber nel dire ia tauerum pleui
 En cele lei qui Deus en terre mist
 A ses apostles quant entrels descendit
 Ne te faudrum tant cum tu serras vifs
 Et io rafi vus de Dev le rei fort
 & en cel esperit quil out en sun cors
 Pur pecchurs quant il suffri la mort
 Ne vus faldrai pur destresce de mun cors
 Ai cest mot dunc mist senseigne fors
 Dunc met sa main en sa chalce vermeille
 Si traist fors vn enseigne de paille
 A treis clous dor la ferma en sa lance
 Od le braz destre en ad braundie la hanste
 De si quas poinz len batirent les lances
 Point le cheual il ne pot muer ne failli
 & fiert un paen sur sa doble targe
 Tute li fent del vn ur desqual altre
 & trenchat le braz qui li sist en lenarme
 Colpe le piz & trenchad lui la coraille
 Par mi leschine sun grant espee li passe

Tut estendu labat mort en la place
 Crie Munioie co fu lenseigne Charle
 Si cum li ors ses uiere fors del argent
 Si sen eslistrent tote la bone gent
 Li couart sen vont od Tedbald fuiant
 Od Viuien remistrent tuit li cheualer uaillant
 Al chef deuant fierent communalment
 Si cum li ors del argent sen turne
 Si sen eslistrent tut li gentil home
 Primerement si ferirent en la pointe
 Communalment ensemble li prudome
 Le plus hardi ni solt lem conuistre
 Al primerains colps li quons Tedbald sen turne
 Vait sen fuiant a burges tote la rute
 Vn grant chemin v quatre ueies furchent
 Quatre larruns i pendirent bouche a boche
 Bas ert le fest curtes erent les furches
 Li cheuals tired pardedesuz lemporte vltre
 Li uns des penduz li hurte lunc la boche
 Vit le Tedbald sin out doel & vergoigne
 De la pour en ordead sa hulce
 & cum il senti que congchie fu tote
 Dunc leue la quisse si la parbute ultre
 Girard apele quil siwi en la rute
 Ami Girard car prenez cele hulce

Or i ad bon & peres precioses
Cent liures en purrez prendre a burges
& Girard li respondi en contre
& io que fereie quant conchie est tote
Qo dist Girard le uaillant meschin
Sire Tedbald atendez mei un petit
Si oirrez tant al regne de berri
Qui io sui remis & tu ten es fui
Nen di que ia men veies vif
& io voil socure Viuien le hardi
Mis parenz est si men est petit pris
& io ai tresor parfunt en terre mis
Si vus dirrai v laueir serra pris
Qui apres ma mort nen creisse nul estrif
La fist Tedbald une folie pesme
Quant pur Girard retirad andous ses resnes
Quant cil la teint del poig al col le dresce
Del altre part le botat de sa sele
De si quas laz len ferid le healme en terre
Puis tendit sa main iuste la Tedbald gule
Si li toli sa grant targe duble
Dor fu urle enuirun a desmesure
Del or de arabe out enmi le bocle
Cil Viuien la toli a vn hungre
En la bataille as prez de girunde

Quant il ocist le paen Alderufe
 & decolad les fiz Burel tuz duze
 Al rei tolid cele grant targe duble
 Si la donad a dan Willame sun vnle
 & il la donad a Tedbald le cuard cunte
 Vncore hui lauerad mult pruzdome a la gule
 Le halberc li tolit qui ert fort & duble
 & la bone espee trenchante iusque lamure
Oerard sadube des armes al chemin
 La runcin laisset al bon cheual sasist
 & Tedbald se redresce cum home esturdi
 Deuant li garde si choisist le runcin
 Prent sei al estriv entre les arcuns sasist
 Quant fu munte membre fut del fuir
 De deuant se garde si vit un grant paleiz
 Fort fu areille quil ne pot pel tolr
 & tant fu halt quil nel pout tressaillir
 Desuz al ual nosad Tedbald venchir
 Pur sarazins dunt il ad oi les criz
 De sus al tertre vit un fuc de brebiz
 Parmi la herde len avint a fuir
 En sun estriv se fert un motun gris
En sun estriv se fiert un gris motun
 Tant le turnad & les vals & les munz
 Quant Tedbald vint a burges al punt

Nout al estriu quel chef del motun
Une tel prie ne portad mes gentilz hom
Lunsdi al vespre
Li poures ni eust tant a perdre
Ore vus dirrai de Girard le meschin
Cum il returnad dreitement sun chemin
Deuant li garde si choisist Esturmi
Sun bon cheual aveit si mesbailli
Co en uolt gent que unques home ni mist
Grant ignelesce en uolt traire Esturmi
Veit le Girard sil ad araisun mis
Co que pot estre cheualer Esturmi
Icil respunt membre del fuir
Turnez arere pensez del renuair
Si ore ne returnes tost i purras mort gisir
Nu frai ia co li dist Esturmi
Co dist Girard vus nen irrez issi
Le cheual broche vassalment le requist
Lescu li fruilde & le halberc li rumpi
& treis des costes en sun cors li malmist
Pleine sa hanste del cheual labati
Quant lout a terre vn curteis mot li ad dit
Vltre lechere pris as mortel hunte
Ne tauanteras ia a Tedbald tun uncle
Si tu tenfuies ni remeint prudome

Nauras ia Willame le cunte
 Ne Viuien sun neveu ne nul altre prudome
 Lunsdi al vespre
 Nauras Viuien ne Willame
Girard sen vait cum plus tost pout
 Gent out la targe & dedenz & defors
 Tute la guige en fu batue a or
 & les enarmes & tut li pan defors
 Vnc plus gent home ne mist Ihesu en lost
Qui fu Girard quant parti de Tidbald
 Vint a la bataille cum il plus tost pout
 Fert vn paen sur la broine de sun dos
 Parmi leschine li mist lespee tut fors
 Enpeint le ben si lad trebuche mort
 Crie Munioie co est lenseigne des noz
 Puis refert altre sur la duple targe
 Tote li freint de lun vr desqual altre
 Trenchad le braz que li sist en lenarme
 Colpe le piz & trenchad la curaille
 Parmi leschine sun grant espee li passe
 Tut estendv labat mort en la place
 Crie Munioie lenseigne Ferebrace
 Lunsdi al vespre
 Cil le choisirent en la dolente presse
Li pruz Viuien ses baruns en apele

Ferez seignurs od voz espees beles
 Ferez fraunceis desrumpez ceste press
 Io ai oi Liwes v Willames
 Sil sunt uenuz lestur ne durra gueres
 Fraunceis i ferent de lur espees beles
 Tant vnt erre par la dolente presse
 Que Girard conurent uolenters len apellent
Dunc li demande Viuien le ber
 Cosin Girard des quant ies cheualer
 Sire dist il de nouel nient de vielz
 Sez tu Girard que danz Tedbald deuint
 & cil li cunte cum il laueit bailli
 Respunt li quons tais Girard bels amis
 Par vostre lange ne seit prudhome honiz
Arai vus ca Girard deuers mun destre poig
 Alum ensemble si met tun gunfanun
 Si io ta ne creui malueis eu grim
 Il sasemblerent le iur furent barun
 En la bataille dous reals compaignuns
 Paene gent mistrent en grant errur
 Lunsdi al vespre
 Dolent est le champ senz le cunte Willame
Viuien garde parmi une champaigne
 Deuant ses oilz vit la fere compaignie
 Del mielz de france pur grant bataille faire

Mult en vit de els gisir a terre
 Dunc tort ses mains tire sun chef & sa barbe
 Plure de ses oilz si li moille sa face
 Forment regrette Willame brace
 & ber marchiz qui nest en bataille
 De tun gent cors auum hui suffraite
 Ces gentilz homes en vnt grant damage
Eranche meisne pur la vertu nostre Seignur
 Ne vus esmaez seignurs freres baruns
 Ci attendruns Willame mun seignur
 Car sil uient nus ueintrum lestur
 Lundi al vespre
 Mar fud le champ comence sanz Willame
Trente corns cornerent al piu une menee
 Set .c. homes vnt la garde muntée
 Ni ad icelui ne porte sanglante espee
 Dunt al champ vnt feru granz colees
 & ainz quil enturnent i ferunt daltre teles
 Viuien eire par mi le sum dun tertre
 Tels treis cenx homes vit de sa tere
 Ni ad icil nait sanglante sa resne
 & dentre ses quisses nait vermeille sele
 Deuant as braz sustenent lur bouele
 Qui lur cheuals nes desrumpent par tere
 Quant il les vit plûralment les apele

Freres baruns que purrai de vus fere
 Naurez mes mirie per nul home de terre
Seignurs baruns pur amur Dev merci
 Enz en uoz liz pur quei irrez murir
 A qui prendrunt ueniance uostre ami
 Si nen ad home al regne Lowis
 Sil vus aueit si malement baillid
Qui peis ne triu ne prissent ia voz fiz
 Ne ia ne garreit roche ne plesseiz
 Chastel ne tur ne ueil fosse antif
Que a lur espees nes estust morir
 Vengum nus ent tant cum nus sumes vif
 & cil responent a vostre plaisir sire ber marchis
 Lur armes pristrent as cheuals sunt sailliz
 Vient a ual sis vnt acoilliz
 Par grant force recomencent a ferir
Del munt v furent sunt aual auale
 Franceis descendent sur le herbe al pre
 Virent des lur les morz & les nafrez
Qui dunc ueist les danceals enseignez
 Lier lur plaies & estreindre lur lez
 Dunc colpat sa hanste qui al braz fu nafrez
 Si la liad quil la pout porter
 Dunc but del vin qui lad el champ troue
Qui nout de tel si but del duit troble

& saim homes en donent as nafrez
Qui nad seignur si done a sun per
Dunc laissent les vifs si vont les morz uisiter
Qels set .c. homes trouent de lur terre
Entre lur pez trainant lur bowele
Parmi lur buches issent fors lur cerueles
& de lur escuz se courent sur lerbe
Trubles vnt les uis & palles les meisseles
Turnez les oilz qui lur sistrent as testes
Gement & crient cels qui les almes i perdent
Quant il les ueient uolenters les apelent
Seignurs baruns que purrad de vus estre
Naurez mes mirie pur nule home de terre
Ahi ore seignurs pur amur Dev merciz
Ia ueez vus les feluns arrabiz
Qui uos vnt mort voz freres & uoz fiz
& uoz neuous & voz charnels amis
Pes ne demandent ne triwes nen unt pris
Car saint Estephne ne les autres martirs
Ne furent mielldres que serrunt tut icil
Qui en larchamp serrunt pur Dev ocis
& cil respunent eiore ber marchis
Lur cheuals pristrent & sur els sunt sailliz
Venent al cham sis vnt rasailliz
Par uiue force comencent a ferir

Des sarazins lur unt mort .xv. mil
Daens les pristrent a merueilus turment
 De dis mil homes ne li leissent que cent
 Dolent poet estre le uaillant cheualer
 Qui od dis mil homes se combati
 & dis mil nout ore que cent cheualers
 & de cels sunt nafre tote lune meite
 Car si poet Viuien le guerrier
Viuien sire pur Dev que fruns
 & il respunt tres ben les veintrums
 Apelum Dev quil nus enueit socurs
 Quil me tramet Willame mun seignur
 V que Lowis i uienge lempereur
 & cil responent a la Dev beneicun
 Viuien fert al chef deuant de lur
 Mil sarazins eu iette mort en lestur
 Païen le mistrent a merueillus irrur
 Des cent ni leissent que vint baruns
 & cil sen vont lez le coin dun munt
Viuien sire que feruns pur Dev
 De bataille ia ne vus aprendrai el
 Car ben les ueintrums solunc la merci Dev
 & cil responent il nus ad tut oblie
 & li plusur dient quil ad le sen desue
 Quant od vint homes volt en bataille entrer 575
 d

A .v.c. mille de paiens tuz armez
 Sil erent pors v uers v sengler
 De hui a un meis nes aurium tuez
 Dist Viuien cest plaid soi io assez
 Ore vus remembre des vignes & des prez
 & des chastels & des larges citez
 & des moillers que a uoz maisuns auez
 Que de co membre ne frad ia barne
 Alez uus ent seignurs & tut par mun gre
 Io remaindrai ici al champ adure
 Ia nen turnerai car pramis lai a De
 Que ia ne fuierai de bataille champel
 Io les ueintrai ben solunc la merci De
A seignurs pur amur Dev merci
 A qui irrez en voz liz morir
 Ia ueez vus les francs cheualers malmis
 Tant cum il furent sains & salfs & vifs
 Ensemble od nus furent al champ tenir
 Asez sauez que vus lur auiez pramis
 A home mort ne deuez pas mentir
 Alez vus ent & io remaindrai ici
 Ia nen irrai car a Dev lai pramis
 Que ne fuierai pur creme de morir
 A icel mot lunt franceit tuit guerpi
 Fors sul Girard qui od lui est remis

Cil remistrent al dolerus peril
 Od dous escuz la bataille tenir
 Lunsdi al uestre
 Od dous escuz suls est asprez remis
Hraunceis senturnent parmi le coin dun tertre
 Deuant els gardent as pleines qui sunt beles
 En icel liu ne poent choisir terre
 Ne seit couerte de pute gent aduerse
 Par tut burnient espees & healmes
 Quant il co ueient que altre ne purrad estre
 Ne ia nen isterunt de la doleruse presse
 Vers Viuiien returnent tost lur reisnes
 Venent al cunte uolenters len apelent
 Viuiien sire sez que te feruns
 Respunt li quons io orrai voz raisuns
 Si tu ten turnes & nus nus enturneruns
 & se tu combatz & nus nus combateruns
 & que que tu faces enseble od tei le feruns
 Respunt Viuiien multes merciz baruns
 Puis en regarde Girard sun compaignun
 En sun romanz len ad mis araisun
Amis Girard es tu sein del cors
 Oil dist il & dedenz & defors
 Di dunc Girard coment te contenen tes armes
 Par fei sire bones sunt & aates

Cum a tel home qui nad fait granz batailles
 & si bosoinz est qui referat altres
Di dunc Girard sentes tu alques ta uertu
 & cil respunt que vnques plus fort ne fu
 Di dunc Girard cum se content tun cheual
 Tost se laissed & ben se tient & dreit
 Amis Girard si io te ossasse quere
 Que par la lune me alasses a Willame
 Va si me di a Willame mun vncl
 Si li remembre del champ del saraguze
 Quant il se combati al paen Alderufe
 Ia set il ben desconfit laueient hungre
 Io vinc en la terre od treis cent de mes homes
 Criai Munioie pur la presse derumpre
 Cele bataille fis io veintre a mun vncl
 Io ocis le paen Alderufe
 & decolai lez fiz Bereal tuz duze
 Al rei toli cele grant targe duble
 Io la toli le iur a un hungre
 Si la donai a Willame mun vncl
 & il la donad a Tedbald le cuart cunte
 Mais ore lad un mult prudhome a la gule
 A ses enseignes quil me uienge socure
Cosin Girard di li ne li celer
 & li remembre de limenes la cite

Ne del grant port al riuage de mer
 Ne de fluri que io pris par poeste
 Aider me uienge en bataille champel
Sez que dirras a Willame le fedeil
 Se lui remembre del champ turlenlerei
 V io li fis bataille trente treis
 Cent cinquante & plus li fis auoir
 Des plus poanz de la sarazine lei
 En une fuie v Lowis senfueit
 Io vinc al terre od dous cent de mes fedeilz
 Criaï Munioie le champ li fis auoir
 Cel iur perdi Raher un mien fedeil
 Le iur que men membre nert hure ne men peist
 Aider me uienge al dolerus destreit
Sez que dirras a Willame le bon franc
 Se lui remembre de la bataille grant
 De suz orenge de Tedbald lesturman
 En bataille v uenquirent franc
 Io vint al tertre od Bernard de bruban
 Cil est mis uncles & barun mult uailant
 A compaignun oi le cunte Bertram
Qui est des meillurs de nostre parente grant
 Od den aie & lenseigne as normanz
 Cele bataille li fis io veintre al champ
 Iloec li ocis Tedbalt lesturman

Aider me uienge al saluz de larchamp
 Si me socure al dolerus haan
 Sez que dirras a Guiot mun petit frere
 De hui a quinze anz ne deust ceindre espee
 Mais ore la ceindrat pur secure le fiz sa mere
 Aider me uienge en estrange cuntree
 Sez que dirras dame Guiberc ma drue
 Si li remembre de la grant nurreture
 Plus de .xv. anz quele ad uers mei eue
 Ore gardez pur Dev quele ne seit perdue
 Quele menuoit sun seignur en aie
 Se le ne menuoit le cunte daltre nai io cen
 Allas dist Girard cum te larrai enviz
 Tais ber nel dire ia est co pur me garir
 La deseurerent les dous charnels amis
 Il vnt grant duel ne vnt giu ne ris
 Tendrement plurent andui des oilz de lur vis
 Lunsdi al uespre
 Deus pur quei seurerent en dolente presse
 Girard senturne par mi le coin dun tertre
 Cinc liwes troue tant encombrece presse
 Que unc ualad un sul arpent de terre
 Quil nabatist sarazin de sa sele
 & quil ne trenchad pe v poig v teste
 & quant il issi de la dolente presse

Sun bon cheual li creue suz sa sele
Del dolent champ quant Girard fu turne
 De suz ses alues est sun cheual creue
 Granz quinze liwes fu li regnes effrei
 Ne trouad home a qui il sache parler
 Ne cel cheual v il puisse munter
 A pe sen est del dolerus champ turne
 Grant fu li chaud cum en mai en este
 & lungs les iurz si out treis iurz iune
 & out tele seif quil ne la pout durer
 De quinze liwes ni out ne dut ne gue
 Fors leve salee qui ert tres lui a la mer
 Dunc li comencerent ses armes a peser
 & Girard les prist durement a blamer
Ohi grosse hanste cume peises al braz
 Nen aidera a Uiuien en larchamp
Qui se combat a dolerus ahan
 Dunc la lance Girard en mi le champ
Ohi grant targe cume peises al col
 Nen aidera a Uiuien a la mort
 El champ la getad si la tolid de sun dos
Ohi bone healme cum mestunes la teste
 Nen aiderai a Uiuien en la presse
 Ki se cumbat el archamp sur lerbe
 Il le lancad & ietad cuntre terre

Ohi grant broine cum me vas apesant
 Nen aiderai a Viuien en larchamp
 Qui se combat a dolerus ahan
 Trait lad de sun dos sil getad el champ
 Totes ses armes out guerpi li frans
 Fors sul lespee dunt dascer fu li brant
 Tote vermeille des le helt en auant
 Lescalberc pleine de foie & de sanc
 Nue la porte si senvait suz puiant
 & lamure uers terre reposant
 La pleine ueie uait, tote iur errant
 & les granz uals mult durement corant
 & les haltes tertres belement muntant
 Sa nue espee al destre poig portant
 Deuers lamure si sen uait a poiant
 Cil nunciad a Willame del archamp
 V Viuien se combat a dolerus ahan
 Od sul .xx. homes fu remis en larchamp
 Viuien lur fiert al chef deuant
 Mil sarazins lur ad ocis el champ
Li quons Viuien de ses vint perdi dis
 Les altres li dient que ferum la amis
 De la bataille seignurs pur Deu mercis
 Ia ueez vus que io en ai Girard tramis
 Aincui uendrat Willame v Lowis

Li quels que i uenge nus ueintrum arrabiz
 & cil responnent a ioie ber marchis
 Od ses dis homes les reuait enuair
 Païen le pristrent en merueillus peril
 De ses dis homes ne li leissent nul vif
 Od sun escv demeine remist le champ tenir
 Lunsdi al vespre
 Od sun escu remist sul en la presse
Quis quil fu remis od un sul escv
 Si lur curt souent sure as turs menuz
 Od sul sa lance en ad cent abatuz
 Dient païen ia nel uerrum vencu
 Tant cum le cheual laissum vif suz lui
 Ia ne ueintrum le noble uassal
 Quant desuz lui leissum vif sun cheual
 I dunc le quistrent as puiz & as uals
 Cum altre beste saluage de cel aguait
 Vne compaignie li vint parmi un champ
 Tant li lancerent guiures & trenchanz darz
 Tant en abatent al cors de sun cheual
 De sul les hanstes fust charge un char
 Vn barbarin vint par mi un val
 Entre ses quisses out un ignel cheual
 En sun poig destre portad un trenchant dart
 Treis feiz lescust a la quarte le lancad

775

e

& fiert li en la broine de la senestre part
 Que trentre des mailles len abat contre val
 Vne grant plaie li fist el cors del dart
 La blanche enseigne li chai del destre braz
 Ne vint le iur que unc puis le reluast
 Lunsdi al vespre
 Ne vint le iur que puis le releuast de terre
Il mist sa main de rere sun dos
 Trouad la hanste trait le dart de sun cors
 Fert le païen sur la broine de sun dos
 Par mi leschine li mist le fer tut fors
 Od icel colp lad trebuche mort
 Vltre lecchere malueis barbarin
 Co li ad dit Viuien le meschin
 Ne repeireras al regne dunt tu uenis
 Ne te ten vanteras iamais a mil dis
 Que mort aiez le barun Lowis
 Puis traist sespee & comence a ferir
 Qui quil fert sur halberc v sur healme
 Sunt colp na restet desque iusquen terre
 Sainte Marie Virgine pucele
 Tramettez mei Dame Lowis v Willame
 Cest oreisun dist Viuien en la presse
Deus Rei de glorie qui me fesis ne
 & de la Sainte Uirgine Sire fustes ne

En treis personnes fud tun cors comande
 & en sainte croiz pur peccheurs pene
 Cele & terre fesis & tere & mer
 Soleil & lune tut co as comande
 & Eva & Adam pur le secle restorer
 Si uerreieient Sire cum tu es ueirs Deus
 Tu me defent Sire par ta sainte bunte
 Que al quor ne me puisse unques entrer
 Que plein pe fuie pur la teste colper
 Tresque la mort me lais ma fei garder
 Deus que ne la mente pur tes saintes buntez
Sainte Marie mere Genitriz
 Si uerreieient cum Deus portas a fiz
 Garisez mei pur ta sainte merci
 Que me mocient cist felon sarazin
 Quant lout dit li bers se repentid
 Mult pensai ore que fols & que brixs
 Que mun cors quidi de la mort garir
 Quant Dampnedeu me meimes nel fist
 Que pur nus mort en sainte croiz soffri
 Pur nus raindre de noz mortels enemis
 Respit de mort Sire ne te dei io rouer
 Car a Tei meisme ne la uolsis pardonner
 Tramettez mei Sire Willame al curbnès
 V Lowis qui france ad a garder

Par lui ueintrum la bataille champel
 Deus de tant moldes pot hom altre ressembler
 Io ne di mie pur Willame al curbnies
 Forz sui io mult & hardi sui assez
 De uasselage puis ben estre sun per
 Mais de plus loinz ad sun pris aquite
 Car sil fust en larchamp sur mer
 Vencu eust la bataille champel
 Allas peccable nen puis home gent
 Lunsdi al vespre
 Que me demande ceste gent aduerse
Grant fu le chaud cum en mai en este
 & long le iur si nout treis iurz mange
 Grant est la faim & fort pur deporter
 & la seif male nel poet endurer
 Parmi la boche vait le sanc tut cler
 & par la plaie del senestre coste
 Loinz sunt les eues quil nes solt trouer
 De .xv. liwes ni out funteine ne gue
 Fors leve salee qui ert al flot de la mer
 Mais par mi le champ curt un duit troble
 Dune roche ben pruf de la mer
 Sarazins lorent a lur cheuals medle
 De sanc & de ceruele fud tut enuolupe
 La vint corant Viuien li alose

Si senclinad al eve salee del gue
Sin ad bev assez estre sun gre
& cil li lancerent lur espees adube
Granz colps li donent al grauer v il ert
Forte fu la broine ne la pourent entamer
Que li ad gari tut le gros des costez
Mais as iambes & as braz & par el
Plus quen vint lius vnt le cunte nafre
Dunc se redresce cum hardi sengler
Si traist sespee del senestre coste
Dunc se defent Viuien cum ber
Il le demeinent cum chens funt fort sengler
Lewe fu salee quil out bev de la mer
Fors est issue ne li pot el cors durer
Sailli li est arere de la boche & del nies
Grant fu languisse les oilz li sunt troblez
Dunc ne sout ueie tenir ne esgarder
Païen le pristrent durement a haster
De plusur parz la coillent li guerreier
Lacent li guiures & trenchanz darz dascer
Tant en labatent en lescv de quarters
Que nel pout le cunte a sa teste drescer
Ius a la terre li chai a ses pez
Dunc le comencent païen formen a haster
& sun uasselage mult durement a lasser

Lancent a lui guiures & aguz darz
 Entur le cunte debatent sun halberc
 Le fort acer detrenche le menu fer
 Que tut le piz courent de claueals
 Ius a la terre li cheent les boels
 Nen est fis que durt longement mes
 Dunc reclaime Deus quil merci en ait
Uiuien eire a pe par mi le champ
 Chet lui sun healme sur le nasel deuant
 & entre ses pezs ses boals trainant
 Al braz senestre les uait contretenant
 En sa main destre porte dascer un brant
 Tut fu uermeil des le holz en auant
 Lescalberc pleine de feie & de sanc
 Deuers lamure sen uait a puiant
 La sue mort le vait mult destreignant
 & il se sustent contreual de sun brant
 Forment reclaime Ihesu le tut poant
 Quil li tramette Willame le bon franc
 V Lowis le fort rei combatant
Deus veirs de glorie qui mains en trinite
 & en la Uirgne fustes regenere
 & en treis persones fud tun cors comande
 En sainte croiz te laissas Sire pener
 Defent mei Pere par ta sainte bunte

Ne seit pur quei al cors me puisse entrer
 Que plein pe fuie de bataille champel
 A la mort me lait ma fei garder
 Deus ne la mente par ta sainte bunte
 Tramettez mei Sire Willame al curbnies
 Sages hom est en bataille champel
 Si la set ben maintenir & garder
Dampnedeus Pere glorius & forz
 Ne seit vnques que cel vienge defors
 Que ca dedenz me puisse entrer al cors
 Que plein pe fuie pur creme de mort
 Vn barbarin vint par mi vn val
 Tost esleissant vn ignel cheual
 Fiert en la teste le noble uassal
 Que la ceruele en esspaut contre val
 Li barbarins i vint esclaisse
 Entre ses quisses out un grant destrer
 En sa main destre vn trenchant dart dascer
 Fert en la teste le uaillant cheualer
 Que la ceruele sur lerbe li chet
 Sur les genoilz abat le cheualer
 Co fu damage quant si prudome chet
 Sur li corent de plusurs parz paens
 Tut le detrenchent contre ual al grauer
 Od els lemporent ne len uolent laisser

Suz un arbre le poserent lez un senter
 Car il ne uoldreient quil fust troue de crestiens
 Desore mes dirrai de Girard lesquier
 Cum il alad a Willame nuncier
 Lunsdi al vespre
 A barzelune la le dirrad al cunte Willame
Li quons Willame ert a barzelune
 Si fu repeire dune bataille lunge
 Quil auet fait a burdele sur girunde
 Perdu i auet grant masse de ses homes
 Este vus Girard qui nouel li cunte
Li ber Willame ert repeire de vespres
 A vn soler sestut a unes estres
 & dame Gviburc estut a sun braz destre
 Dunc gardat par la costere dun tertre
 & vit Girard qui del archamp repeire
 Sanglante espee portat en sun poig destre
 Deuers lamure se puiat contre terre
Seor dulce amie dist Willame al curbnies
 Bone fud lore que io te pris a per
 & icele mielde que eustes crestiente
 Par mi cel tertre vei un home aualer
 Sanglante espee en sa main porter
 Si vus dirrai une chose pur uerite
 Quil ad este en bataille champel

Si vient a mei pur socurs demander
 Alun encontre pur noueles escolter
 Entre Guiberc & Willame al curbnies
 Deualerent contre ual les degrez
 Quant furent a ual Girard vnt encontre
 Veit le Willame sil conuit assez
 Dunc lapelad sil prist a demander
Avant Girard si dirrez de uoz noueles
 Co dist Girard io en sai assez de pesmes
 Reis Deramed est eissuz de cordres
 En halte mer en ad mise la flote
 & est en france que si mal de sen orte
 Les marchez guaste & les aluez prent
 Tote la tere turne a sun talent
 V que troue tes cheualers sis prent
 A lur barges les maine corecus & dolent
 Pense Willame de secure ta gent
Reis Derame est turne de sun pais
 & est en la terre quil met tut a exil
 Alez i furent Tedbald & Esturmi
 Ensemble od els Viuien le hardi
 Li uns se combat les dous en sunt fuiz
 Deus dist Willame co est Viuien le hardiz
 Respunt Girard or auez vus ueir dit
 Il te mande & io sui quil te di

f

Que tu le secures al dolerus peril
Sez que te mande Viuien tun fedeil
 Si te remembre del champ de turleislerei
 V te fist batailles trente treis
 Cent cinquante & plus te fist auoir
 En une fuie v Lowis senfuieit
 Il vint le tertre od dous cent franceis
 Criad Munioie le champ te fist auoir
 Cel iur perdi Rahel un sun fedeil
 Quant li en membre nert hure ne li empeist
 Aider li algez al dolerus destreit
Sez tu que te mande Viuien le ber
 Ke te souenge de limenes la cite
 Ne de breher le grant port sur mer
 Ne de flori quil prist par poeste
 Aider li uienges en larchamp sur mer
Esez que mande a dame Guiburc sa drue
 Ke lui remembre de la grant nurette
 Quil ad od lui plus de .xv. anz eue
 Ore gard pur Dev quele ne seit perdue
 Que le li enueit sun seignur en aide
 Car si lui nenuit daltres nad il cure
Esez que mande a Guiot sun petit frere
 De hui en quinze anz ne dust ceindre espee
 Mais ore la prenge pur le fiz de sa mere

1000

Aider li uiege en estrange cuntree
A Deus dist Willame purrai le vif trouer
Respunt Guiberc pur nient en parlez
Secor le sire ne te chalt a demander
Se tu li perz nauras ami fors Dev
Quant lot Willame sin ad sun chef crolle
Plorad des oilz pitusement & suef
Leve li curt chalde iuste le nies
La blanche barbe moille tresqual baldre
Guiberc apele si li prist a mustrer
De sun corage li volt li bers espermenter
De si cum ele aime lui & sun parente
Quant il parlad si ad dit que sene
Seor dulce amie pur amur De
Vncore nen ad que sul treis iurz passez
Que io sui uenu de bataille champel
Que ait fait grande a burdele sur mer
Si ai perdu mun nobile barne
Loinz sunt les marches v io ai a comander
Fort sunt les homes que deureie asembler
& ensurquetut nel purreie endurrer
Fer & acer i purreit hom vser
Ben se combat Viuien lalose
Ai ceste feiz nel puis mie regarder
Ceste bataille pot ben sanz mei finer

Dunc comencad Guiburc forment a plorer
 Ele sabeissad baisa lui le soller
 Willame apele si li prist a mustrer
 Secor le sire ne te chaut a demurer
 Mun niefs Guischard te uoldrai comander
 Tue merci ben le mas adube
Sire Willame io te chargerai Guiscard
 Il est mis nies mult est pruf de ma char
 Tue merci auant her le madubas
 Si nel me renz ne girras mes entre mes braz
 Il li afia cher se repentirad
 Que vif v mort sis nies li rendrat
 En bataille reneiad Dev Guischard
 Lunsdi al vespre
 En bataille reneiad Dev celestre
Oviburc meismes serui Girard de leve ¹⁴⁵⁰
 & en apres le seruit de tuaille
 Puis lad assis a une halte table
 Si lui aportat dun sengler un espalle
 Li quons la prist si la mangat a haste
 Ele li aportat un grant pain atamis
 & dunc en apres sun grant mazelin de vin
 Girard mangat le grant braun porcin
 & a dous traiz ad uoide le mazelin
 Que vnques a Guiburc mie nen offrit

1050

Ne ne radrescat la chere ne sun vis
 Veist le Guiburc a Willame lad dit
 Pur Dev bel sire cist est de uostre lin
 & si mangue un grant braun porcin
 & a dous traiz beit un cester de vin
 Ben dure guere deit rendre a sun veisin
 Ne ia uilment ne de champ fuir
 Respunt Willame pur Dev Guiburc merci
 Co que ad mange de uolente lad pris
 Il ne mangat ben ad passe treis dis
 Prest fu li liz si firent Girard dormir
 Lunsdi al uestpre.
 Prest fu li liz si firent dormir Girard
Girard se dresce & leuad del manger
 Prest fu li liz si sest ale colcher
 Guiburc la franche le serui uolenters
 Tant fud ad lui quil endormi fu
 Puis le comande al cors altisme Deu
 Tant dormi Girard quil fu a uestpre
 Puis salt del lit cume francs naturel
 Munioie escrie cheualers car muntez
 Armes demande & lem li uait aporter
 I dunc aprimes fu Girard adube
Dunc li uestrent une broigne mult bele
 & vn uert healme li lacent en la teste

Willame li ceinst lespee al coste senestre
 Vne grant targe prist par la manuele
 Cheual out bon des meillurs de la terre
 Puis muntad Girard par sun estriu senestre
 Dame Guiburc li vait tenir la destre
 Sil comande a Dev le grant Paterne
 Quant il auesprad a la bone cite
 Issu sen est Willame al curbnies
 Od trente mile de cheualers armez
 En larchamp requistrent le paen Derame
 A la freidure vnt tote nuit erre
 Iusqual demain que le iur apparut cler
 Si cum il furent en larchamp sur mer
 La bataille out uencue Derame
 & out pris leschec & les morz desarmez
 Entrez erent sarazins en lur nefz
 & as salandres & as granz eschies ferrez
 Lur uent demoert si nen poent turner
 Mais les demeines & les seignurs & les pers
 Tere certeine alerent esgarder
 Vne grant liwe lez le grauer de la mer
 Est vus Willame al conseil assene
 Od .xxx. mille de cheualers armez
 Les quinze mile furent si apretez
 Cum a ferir en bataille champel

Cil crient Munioie si vont od els iuster
 Mais li paien nel poeient endurer
 Car il nunt armes pur lur cors garder
 Coillent fuie vers la grant eue de mer
 Saillent as salandres & as barges & as niefs
 Paruent lur armes si sunt conreiez
 Ces sarazins de segune tere
 Cent mile furent si apreste de guere
 Ni ad nul qui nait halberc & healme
 Dor les fruntels & les esses
 Espes ceintes les branz burniz uers terre
 Les escuz tindrent as manueles
 Espes trenchanz eurent en lur poinz destres
 Cheuals darabe vnt corant suz lur seles
 Cil sen issirent en la sable grauele
 Si se pristrent de fors a la certeine terre
 Par icels orrez doleruses noueles
 Cil murent al cunte Willame grant guere
 Cele bataille durad tut vn lundi
 & al demain & tresque mecredi
 Que ne la laschat ne hure ne prist fin
 Iusqual ioesdi deuant prime un petit
 Que li franceis ne finerent de ferir
 Ne cil darabe ne cesserent de ferir
 Des homes Willame ne remist un vif

Ioesdi al uestre
 Fors treis escuz quil out al champ tenir
Od treis escuz remis al champ tut sul
 Li vns fu Girard li uaillant ferur
 Li altres Guischard le nevou dame Guibure
 Plaist vus oir des nobles baruns
 Cum il seuererent del reals compaignun
Plaist vus oir des nobles vassals
 Cum il seuererent del cheualer real
 De sur senestre sen est turne Girard
 En un sablun li chai sun cheual
 Sur ses espalles sun halberc li colad
 Trente paens descendirent al val
 En trente lius naffrerent le uassal
 Par mi le cors despeiez & de darz
 Crie & husche quant la mort laprocad
 Dunc suruint Willame icele part
 Les dis ocist les vint fuient del val
 & vint a Girard dulcement lapelad
Amis Girard qui ten fereit porter
 & des granz plaies purreit tun cors saner
 Dites ami garreie ent ber
 Tun escientre entereies ia en ciel
 Respunt Girard sire laissez co ester
 Ia ne querrai que io en fuisse porte

Ne de granz paleis que fust mun cors sane
 Car ne garrai ia pur nul home mortel
 Mais qui tant me ferreit que io fuisse munte
 & mun vert healme me fust raferme
 Mesist mei al col mun grant escv bocler
 & en mun poing mun espe adole
 Puis me donast un sul trait de vn vin cler
 & qui nen ad vin me doinst del duit troble
 Ne finereie iamais par la fei que Dei de
 Cher lur uendereie les plaies de mes costez
 Dunt a grant force en est li sancs alez
 Respunt Willame ni remaindrez
 Ioesdi al vespre
 Descendi li quons Willame
 Tendi sa main sil prist par la main destre
 En seant le drescat sur lerbe
 Troble out le vis & pasle la maissele
 Turnez les oilz que li sistrent en la teste
 Tut le chef li pendi sur senestre
 Sur le mentun lenbronchat sun healme
 Quant lalme envait ne pot tenir la teste
 & dist Willame Girard ne poet altre estre
 Deus quel doel quant tels baruns deseuererent
 Nen pot que nel en plainst Willame
Plaist vus oir del neuov dame Guberc

1175

g

Ki de Willame deseuerad le iur
En sun cheual chai al sablun
Sur ses espalles sun halberc li colad tut
Trente paiens deualerent dun munt
En trente lius nafrent le barun
Crie & husche le aie de prudom
A tant i uint Willame le barun
Les dis oscist les vint fuient le munt
Dunc vint a Guischard sil ad mis araisun
Ami Guischard qui ten fereit porter
& des granz plaies fereit tun cors saner
Tun escientre entreis ia en ciel
Respunt Guischard sire laissez mei ester
Io ne querreie que ia en fuisse porte
Ne des plaies fust mun cors sanez
Qui me ferreit tant que io fuisse munte
Ia de uoz armes ne querreie nul porter
Mais donez sul un trait de vin cler
Si nas altre veals de cel diut troble
Puis men irreie a cordres v fui ne
Nen crerreie meis en vostre Dampnede
Car co que io ne uei ne puis aorer
Car si io eusse Mahomet merciez
Ia ne veisse les plaies de mes costez
Dunt a grant force en est le sanc alez

Respunt Willame glut mar fuissez tu nez
Tant cum aueies creance & buntez
Retrasistes a la sainte crestiente
Ore es ocis & de mort afole
Nen poez muer tant as de lassete
Ia de cest champ ne serrez pur mei porte
Ioedi al vespre
Si sabeissat li quons Willame
Tendit sa main sil prist par le braz destre
En sun seant le leuad de tres sa sele
Un barbarin eslaissant le val
Entre ses quisses vn ignel cheual
En sa main deste porte un trenchant dard
Treis feiz lescust a la quarte le lancat
Fert en la loigne de la senestre part
Grant demi pe enz el cors li en abat
De tres le cunte en ad mort Guischart
Peisit le cors si turne vne part
& il le redresce od sun senestre braz
Deuant li le mis sur le col de sun cheual
Al poig destre li traist del cors le dard
& fier le païen de sur le tuenard
Enpeint le ben par grant vertu labat
Nen fuit mie Willame ainz sen vait
Deuant li aporte mort Guischart

Ioesdi al uespre
 Nen fuit mie li bons quons Willame
Dame Guiberc nel mist mie en oblier
 Ele sout en larchamp Willame al curbnies
 En la bataille le païen Derame
 Prist ses messages ses homes fait mander
 Tant quele en out .xxx. mile de tels
 Le .xv. mille furent si apreste
 Cum de ferir en bataille champel
 Tuz les demeines en ad Guiburc seurez
 Sus al paleis les assist al digner
 Chancuns & fables lur fait dire & chanter
 Guiburc meimes les sert de vin apporter
 Dunc sapuiad al marbrin piler
 Par une fenestre prist fors a esgarder
 & vit Willame par une tertre aualer
 Vn home mort deuant li apporter
 Dunc li souint de Viuien lalose
 Si anceis ert lie dunc comence a plorer
 Par Dev seignurs a faire ai asez
 Par un cel tertre vei mun seignur aualer
 Vn home mort deuant li apporter
 En gisant lad sur sun arcun turne
 Co est Viuien iol sai ben assez
 Tais madame ia sur li nel turnez

Co li dient les baruns del regne

Bi serreit il dunc pur Dev merci seignur

Ke ia Willame aportast del estur

Se co nere Lowis sun seignur

V Viuien le hardi sun nevou

Taisoz ma dame ia sur els nel metum

Ainz ad mun seignur Willame un iugleur

En tote france nad si bon chantur

Nen bataille plus hardi fereur

& de la geste li set dire les chancuns

De Clodouev le primer empereur

Que en duce france creeit eu Dev nostre Seignur

& de sun fiz Flouent le poigneur

Ki lassad de dulce france lonur

& de tuz les reis qui furent de ualur

Tresque a Pepin le petit poigneur

& de Charlemaigne & de Rolant sun nevov

De Girard de viane & de Oliuer qui fu tant pruu

Cil furent si parent & sis ancesur

Preuz est mult & pur co laime mun seignur

& pur sul i tant quil est si bon chanteur

& en bataille uassal conquereur

Sil en aporte mun seignur del estur

Seignurs frans frans homes pur amur Dev

Preer vus uoil que congie me donez

1275

Il est mi sire iol dei seruir aler
 Ele auale contreual les degrez
 Vint a la porte si li ad desferme
 En sus le oure laissad le cunte entrer
 Il la regarde & prist lui a demander
 Dame Guiburc desquant gardas ma porte
 Par ma fai sire de nouel le faz ore
 Sire quons Willame mult as petite force
 Seor duce amie desquant ies mun porter
 Par ma fei sire de nouel nient de vielz
 Sire Willame poi en remeines cheualers
Qien dame Guiburc co est tun neuou Guischarde
 Ia Viuien le cunte vif mes ne verras
 La franche femme li tendi ses braz
 & il li colchat desus le mort uassal
 Peise le cors si li faillirent les braz
 Ele fu femme si out fieble la char
 Contre tere en prist le cors vn quas
 Tote la langue li turnad une part
 Ioesdi al uespre
 Guiburc le garde ius a la tere
 Troble out le vis & pasle la maissele
 Turnez les oilz qui li sistrent en la teste
 Tote la langue li pendit sur senestre
 Sur le mentun li enbrunchat sun halme

Plurad Guiburc dunc la confortat Willame
Par Dev Guiburc tu as dreit que tu plurs
 Kar ia diseient en la cur mun seignur
 Que eres femme Willame uns riche hom
 Vn hardi cunte un uaillant fereur
 Ore estes femme a un malueis fuieur
 Un quart cunte un malueis tresturnur
 Qui de bataille nameine hom un sul
 Des ore serrez vus uostre kev & uostre pestur
 Ne serras mie a la fere barnur
 Ne ia ne uerras Viuien mun nevou
 Qui ken peise remis est ma baldur
 Jamais en tere naueraï mortel honur
 Plurad Willame dunc lacrimat Guiburc
 La dame entent la plainte sun seignur
 Partie ubliad de la sue durlur
 Quant el parlad si dist par grant amur
Marchis Willame merci pur amur De
 Il est grant doel que home deit plorer
 & fort damage kil se deit dementir
 Il fu custume a tun riche parente
 Quant altres terres alerent purchacer
 & tuz tens morurent en bataille champel
 Mielz voil que moergez en larchamp sur mer
 Que tun lignage seit per tei auile

Ne apres ta mort a tes heirs repruue
Quant lot Willame prist sun chef a croller
Plurad des oilz tendrement & suief
Guiburc apele sa amie & sa moiller
En sun romanz li ad dit & mustre
Seor dulce amie merci pur amur De
Qui ken peise mult ai a plurer
Treis cenx anz ad & cinquante passez
Que io fu primes de ma mere nez
Veil sui & feble ne puis armes porter
Co est failli que Deus maueit preste
Va grant iuuenta que ne poet retourner
Si me vnt paiens acuilli a tel vilte
Pur me ne uolent fuir ne tresturner
La bataille ad uencue Derame
Si ad pris leschec & les morz desarmez
Entrez sen sunt paens en lur niefs
Loinz sunt les marches v ai a comander
Fort sunt les homes que deureie assembler
& quant io uendreie en larchamp sur mer
Si serreient li sarazin turne
Ki quen peise io sui tut remes
Iamais en terre naurai honur mortel
Plorad Willame Guiburc lad conforte
& marchis sire merci pur amur De

1350

Ore me laissez mentir par vostre gre
Io en aurai ia trente mille de tels
Les quinze mille par sunt si apretez
Cum a ferir en bataille champel
V sunt il Guiburc tu nel me deis celer
Seor duce amie di men la uerite
Sus el paleis sunt assis a digner
Dunc rist le cunte si laissad le plorer
Ore va Guiburc mentez asez par mun gre
Dunc contre munt muntad les degrez
Anceis plorat mais dunc prist a chanter
Cil la regardent si li vnt demande
Dame Guiburc que auez vus la defors troue
Par Dev seignurs mult de ma uolonte
Ia est venue Willame al curbnies
Tut sains & salfs solunc la merci Dev
Si ad uencu la bataille champel
& ocis le païen Derame
Mais dune chose ad malement erre
Il ad perdu sun noble barne
De dulce france la flur & la belte
Ocis li unt Viuien lalose
En paisnisme nen la crestiente
Mieldre uassal ne pout estre ne
Pur eshalcer la sainte crestiente
h

Ne pur lei maintenir ne garder
 Pur Dev vus pri quen larchamp alez
 Fruisses sunt les barges & trestotes les nefes
 Le vent demoert ne sen poent turner
 En une roche lez un regul de mer
 La sunt dis mille de sarazins entre
 Lor & l'argent en vn od els porte
 & pris les checs & les morz desarmez
 Suls fud mi sire ni pout mes ester
 Ki ore irreit en larchamp sur mer
 Prendre ices dunt vus ai ci cunte
 & mis sires ad mult larges heritez
 Si vus durrat uolenters & de gre
E ki ne uolt sanz femme prendre terres
 Io ai uncore cent & seisante puceles
 Filles de reis nad suz cel plus beles
 Sis ai nurriz suz la merci Willame
 Qui mun orfreis ourent & pailles a flurs aroeles
 Venge a mei & choisist la plus bele
 Durrai lui femme & mun seignur li durrat terre
 Si ben i fert que loez poisse estre
 Tel saati de choisir la plus bele
 Qui en larchamp perdi puis la teste
 Ioesdi al uestre
 Guiburc meisme sert sun seignur de lewe

Ovis lad assis a une basse table
 Ne pout aler pur doel a la plus halte
 Puis li aportat dun sengler vn espalle ✓
 Li bers la prist si la mangat en haste ✓
 Il la fist tant cum ele fust mult ate
 Ele li aportad un grant pain atamis ✓
 & desur cel dous granz gastels rostiz
 Si li aportad un grant poun rosti
 Puis li aportad un grant mazelin de vin ✓
 Od ses dous braz i out asez a sustenir
 Mangat Willame le pain atamis
 & en apres les dous gasteals rostiz
 Trestuit mangat le grant braun porcin ✓
 & a dous traiz but un sester de vin ✓
 & tut mangad les dous gasteals rostiz
 & si que a Guiburc une mie nen offrid ✓
 Ne redrescad la chere ne le vis ✓
 Veist le Guiburc crollad sun chef si rist ✓
 Pur quant si plurat damedous des oilz del vis
 Willame apele en sun romanz si li dist ✓
 Pur Dev de glorie qui convertir me fist ✓
 A qui renderai lalme de ceste peccheriz
 Quant ert le terme al iur de grant iuis
 Qui mangue un grant pain atamis
 & pur co ne laisse les dous gasteals rostiz 1425

& tut mangue un grant braun porcin ✓
 & en aproef un grant poun rosti
 & a dous traiz beit vn sester de vin ✓
 Ben dure guere deit rendre a sun veisin ✓
 Ia trop vilment ne deit de champ fuir ✓
 Ne sun lignage pur lui estre plus vil ✓
 Seor dulce amie dist Willame merci ✓ 1458
 Si io murreie qui tendreit mun pais
 Io na tel eir qui la peusse tenir
 Del fev se dresce un suen neuov dan Gui
 Cil fud fiz Boeue cornebut le marchis
 Neez de la fille al pruuз cunte Aemeris
 Neuov Willame al bon cunte marchis
 & fud frere Viuien le hardiz
 Nout uncore .xv. anz asez esteit petiz
 Nout point de barbe ne sur li peil vif
 Fors icel de sun chef dunt il nasqui
 Sur pez se dresce deuant sun uncle enuint
 Si apelad cum ia purrez oir
 A la fei vncle co dist li emfes Gui
 Si tu murreies io tendreie tun pais
 Guiburc ma dame uoldreie ben servir
 Ia nauerad mal dunt la puisse garir
 Pur co quele mad tant suef nurri
 Quant lot Willame vers lenfant se grundit 1450

Dunc li respunt Willame mult laidement li dist
Mielz vus uient glut en cendres a gisir
Que tei ne fait mun conte a tenir
¶ Mielz vus uient gluz en cendres a reposer
Ke ne te fait a tenir ma cunte
Guiburc ma femme nauras tu ia a garder
Quant loi Gui dunc respunt cum sene
A la fei sire uncle unques mes noi tel
Respunt Willame glut de quei men culpez
Io vus dirrai mais io men uoil purpenser
Cum celui qui nest par fund sene
A sun talent se lait demesurer
Pur petitesce que mauiez a blasmer
Ia nest nul si grant que petit ne fust ne
& par la croiz de cel altisme De
Ia nen ad home en la crestiente
Men escientre ne en la bataille De
Sen pruf ta mort parueit tes heritez
Puis que mort est Viuien lalose
Nel ocesisse en bataille champel
Puis saisereie totes voz heritez
Guiburc ma dame fereie mult ben garder
Quant lot Willame prist le chef a croller
Plurad des oilz tendrement & suief
Lenfant apele sil prist a acoler

Treis feiz le beise & puis li ad mustre
 A la fei nies sagement as parle
 Cors as denfant & si as raisun de ber
 Apres ma mort te seit mun fee done
 Pren le Guiburc meine le en ta chimene
 Ioesdi al vespre
 Nad que .xv. anz si li donad grant terre
Li quons Willame est del manger leue ✓ 1064
 Prest fu li liz si est culcher ale ✓
 Guiburc la franche li tastunad suet ✓
 Il ni out tele femme en crestiente
 Pur sun seignur servir & honorer
 Ne pur eshalcer sainte crestiente
 Ne pur lei maintenir & garder
 Tant fu ad lui quil sendormi suef ✓
 Puis comandad sun cors al altisme Dev ✓
 Dunc vait en la sale as cheualers parler
 Tant dort Willame quil fu auespre ✓
 Puis salt del lit cum hardi sengler ✓
 Criad Munioie frans cheualers muntez ✓
 Armes demande & lem li vait apporter ✓
Dunc li uestrent une broine mult bele ✓
 & un vert healme li lacent en la teste ✓
 Sa espee out ceinte le brant burni uers terre ✓
 Vne grant targe i tint par maneuele ✓ 1500

Espe trenchante out en sun poig destre
 Puis li baisad le pie sil enclinad uers terre
 Sil comandad al glorijs Rei celestre
 Quant il auesprad en la bone cite
 Issuz sen est Willame al curbnies
 Od .xxx. mille de cheualers armez
 En larchamp requistrent le païen Derame
 Dunc remist sule Guiburc en la bone cite
 En un soler en unt Guiot mene
 Tant cum il uirent Willame al curbneis
 Gui & Guiburc sil commanderent a Dev
 Quant plus nel virent dunc prent Gui a plurer
 Veit le Guiburc prist lui a demander
 Ami Guiot que auez a plurer
 Par ma fei dame a faire lai assez
 Nai que .xv. anz si sui en tel vilte
 Retenu sui de bataille champel
 Qui me durreit ne fee ne heritez
 Quant nel deserf od espee de lez
 Par mi cel tertre uei mun seignur aler
 Vilment cheualche a bataille champel
 Od lui nameine nul sun ami charnel
 Fors Deu de glorie qui le mund ad a saluer
 Respunt Guiburc merci Guiot pur Dev
 Trop par es enfes & de petit ee

Si ne purreies ne trauailler ne pener
 La nuit ueiller ne le iur iuner
 La grant bataille souffrir nendurer
 Si tad le cunte ci a mei comande
 Par nul engin ne te larrai aler
 Car io creïm perdre sa amiste & sun gred
 Respunt Guiot vnc mais nen oi tel
 Io sai mentir si li uoldrai cunter
 Que io vus sui tut par force eschape
 Sil te pleuis & de Dev & de mei
 Se io ni uois en larcham sur mer
 Ia ne uerras Willame od le curb nies
 & si io uois uoldrai len amener
 Respunt Guiburc dunc te larrai aler
Dunc li uestent une petite broine
 & une petite healme li lacent desure
 Petite espec li ceinstrent mais mult fu bone
 Al col li pendirent une petite targe duple
 Puis li aportat une glaiue petite
 Bon fu li fers & redde en fu la hanste
 De ci quant poinz li batid lenseigne
 E li li ameine Balzan sun sambuer
 Bone est la sele mais curt sunt li estriuer
 Vnc Guiburc nel prestad a cheualer
 Dunc muntat Guiot & Guiburc li tint lestriv 1550

Puis li comandat al Criatur del ciel
 Petit est Gui & li cheual est grant
 Nest que pe & demi de sus les arcuns parant
 & sul trei deie suz le feltre brochant
 Mielz portad armes que uns hom de trente anz
 Guiot point Balcan si li laissad la reisne
 Pe & demi out le cors sur la sele
 A sul trei deie brochad de suz le feltre
 & ele le comandat a Dev le grant De Paterne
 As esquiers se mist Guiot en la grant presse
 Note nuit ad od esquiers erre
 Iusqual demain que li iur apparut cler
 Si cum il uindrent en larchamp de sur mer
 As cheualers vait Willame parler
 Les baruns en ad par sei seurez
 As vn conseil une part en sunt ale
 En sun romanz lur ad dit & mustre
 Seignurs baruns mei deuez vus aier
 Io ne vus toil voz uealtres ne voz chens
 Si uoliez ainz vus durrai des miens
 Ne nen uoil prendre ostur ne esperuer
 Ne nul semblant faire de nul enplaidier
 Si le pere fu morz io en oi le fiz si cher
 Que unc la mere nel laissai corescer
 Ne iamais sergant ne fis sun aueir chacun

1575

i

Ainz en nurri les fiz mult uolenters
 Sis gardai tant que io en fis cheualers
 Tote la terre li rendi sanz relef
 Sil fu petit iol acru del mien
 Fel seit Willame sil vnques en out dener
 Ore socurrez hui vostre gunfanuner
 & cil respunent sire mult uolenters
 Ne vus faldrum tant cum serrum sur pez
 Lunsdi al uestre
 De tel seignur deit lum tenir terre
 & si bosoinz est morir en la presse
Dunc laist les demeines quan lorent afie
 As uauassurs en vait dan Willame parler
 A un conseil les ad tuz amenez
 En sun romanz lur ad dit & mustrez
 Seignurs baruns uauassurs onurez
 En ceste terre nus ad requis Derame
 Le sun orguil ne deit gueres durer
 & hom ne deit mie soffrir ne esgarder
 Pur co vus di frans cheualers pruu
 Tel home munt ocis dunt mult me deit peser
 Car il munt mort Viuien lalose
 De ca la riu ne de la la mer
 En paenisme nen la crestiente
 Ne pout lom unques mielldre uassal trouer 1600

Pur esahlcer sainte crestiente
Ne pur lei meintenir & garder
Pur co vus di francs cheualers menbrez
Il nen ad home en la crestiente
Tant uauasurs peusse de tels asembler
Fors Lowis qui france ad a garder
Cum dreit seignur li noble onure
Encontre lui ne me dei pas vanter
Ore entendez frans cheualers prueuz
Ia nert ben faite grant bataille champel
Se uauassurs ne la funt endurer
& ne la meintenent les legers bachelers
Les forz les uigrus les hardiz les menbrez
Dunc gardat entrels si vit Guiot ester
Il lur demande qui est cel petit arme
Sur cel cheual qui entre vus vei ester
Bosoing out de homes qui ca lad amene
Cil respundent pur quei nus demandez
Guiot uostre neuuev deussez conuistre assez
Quant lot Willame prist le chef a croller
Dunc plurad des oilz tendrement & suef
Dunc comence Guiburc forment a blasmer
Mal gre en ait hui de Dev ma moiller
Ore i pert nes que ne li apartenez
Quant loi Gui dunc respunt que senez

A ma fei sire a grant tort la blamez
A une femme me comandas a garder
& io li sui tut par force eschape
Glut dit le cunte vus de quei me colpez
Io vus dirrai mais un petit matendez
Veez paiens as barges & as nies
Tel home vnt mort dunt mult vus deit peser
Il vnt ocis Viuien lalose
Sur els deuom nus nostre maltalant turner
Par ma fei nes sagement as parle
Cors as denfant & raisun as de ber
Après ma mort tei seit mun fe done
Mais dune chose me pot forment peser
Trop par es ioefne & de petit eed
Si ne purras trauailler ne pener
Les nuiz ueiller & les iurz iuner
La grant bataille souffrir ne endurer
Mais io te ferai sur cel munt mener
A vint de mes homes te ferai illoc garder
I tant i perdirai & si ne garderai el
Icil me aidassent en bataille champel
Respunt dan Guiot vnc mais noi itel
Nies dist Willame de quei maculpez
Iol vus dirrai quant tu le mas demande
Quidez vus dunc que Deus seit si oblie

Qui les granz homes pot tenir & garder
 Qu'il ne face des petiz altre tel
 Ia nest nul granz que petit ne fud ne
 Vncore hui ferrai del espee de mun lez
 Si purrai ben mun hardement prouer
 Si en mei ert salue lonur & le herite
 Respunt Willame sagement toi parler
 Poig dunc auant fai cel cheual errer
 Ore uoil ueer cum poez armes porter
 Gui point Balcan si li laschad les reisnes
 Pe & demi ad le cors sur la sele
 A sul treie deie broche de suz la feltre
 Brandist la hanste de sur le braz senestre
 Tote lenseigne fait uenir tresken terre
 Il la redresce & le uent la uentele
 Balcan retient en quatre pez de terre
 Si que la cue li trainad sur lerbès
 Dreit a sun seignur drescat sa reisne
 Co dist Willame ben deis cheualer estre
 Si fut tis pere & tis autres ancestre
Qi traiez nies Gui uers mun destre poig
 Od le mien ensemble porte tun gunfanun
 Si io tai ne crem malueis enguun
 Il sassemblerent le iur furent baruns
 En la bataille dous reals compaignuns

Paene gent mistrent a grant dolor
Lunsdi al uestre
Si ni alast Gui ne reuenist Willame
Ua bataille out uencue Derame
Al altre feiz que Willame i fu al curbnies
Si out pris leschec & les morz desarmez
Entrez erent sarazins en lur nefz
Lur uent demoert ne sen poent turner
Mais les seignurs des paens & les perers
Ben tresque vint mile de la gent Derame
Terre certaine alerent regarder
Vne grant live loinz del grauer sur la mer
Ensemble od els vnt lur manger aporte
En renc estient assis a un digner
Es vus Willame al manger asene
Od .xxx. mile de cheualers armez
Qui un freit mes lur ad aporte
Crient Muntioie si vont od els iuster
Païen escrient francs cheualers muntez
Dunc saillent des tables al estur communel
Ico i remist que ne sen pout turner
Pain & vin & char i ad remis assez
Vaissele dor & tapiz & dossels
Mais li païen nen purrent endurer
Acuillent fuie uers la halte eve de mer

1700

Si entrent es barges & es nefes
 Peruent lur armes pur lur cors conreier
 A terre certaine lur vint estur doner
 - Li quons Willame leust dunc ben fait
 A grant honor leust Dampenedev atrait
 Quant Derame li salt dun aguait
 Od lui .xv. reis que io nomer vus sai
 Encas de egipte & li reis Ostramai
 Butifer li pruz & li forz Garmais
 Turlen de dasturges & sis nies Alfais
 Nubles de inde & Ander li persans
 Aristragot Cabuel & Morans
 Clamador & Saluains & Varians
 & li reis de nubie & li guerreres Tornas
 Chascun dels out mil homes de sa part
 Si manguent la gent cum dragun & leppart
 En bataille ferent sanz nul regart
 Li vns les meine quant li altre les abat
 - Hui mes irrunt franceis a dolerus ahan
 La fu pris le neuov Willame Bertram
 & Guielin & li uaillant quons Guischarde
 Galter de termes & Reiner le combatant
 Estreit les vnt liez sarazins & persant
 Veant le cunte les meinent as chalans
 Que unques de rien ne lur poet estre garant 1725

Tuz sunt franceis pris & morz al champ
 Fors sul Willame qui ferement se combat
 & Guiot sis nies qui li vait adestrant
Clers fu li iurz & bels fu li matins
 Li soleiz raie qui les armes esclargist
 Les raies ferent sur la targe dan Gui
 Mult tendrement plurent des oilz de sun vis
 Veit le Willame demander li prist
 Co que pot estre bels nies sire Gui
 Respunt li enfes io vus aurai ia dit
 Mar vi Guiburc que suef me norist
 Qui me soleit faire disner si matin
 Ore est le terme quele le me soleit offrir
 Ore ai tel faim ia me verras morir
 Ne puis mes armes manier ne sustenir
 Brandir ma hanste ne le Balcan tenir
 Ne mei aider ne a altre nuisir
 Aincui murray co est duel & peril
 Deus quele suffraite en auront mi ami
 Car tele faim ai ia menragerai vif
 Ore uoldreie estre a ma dame servir
 Moert mei le quor falt mei mun uasselage
 Ne puis aider a mei ne nuisir a altre
 Porter ne puis ne iustiser mes armes
 Aincui murray co est duel & damage

Qoerent mi vncle anduis les oilz de mun chef
 Faillent mei les braz ne me puis pruf aider
 Car tel faim ai ia serraï esrage
 Mar vi Guiburc uostre franche moiller
 Qui me soleit faire si matin manger
 Aincui murray a duel & a pecche
 Deus quele suffraite en aureient cheualer
 Vncore uiuerai si aueie a manger
 Deus v le prendrai Willame li respundi
 Lunsdi al vespre
 Deus que ore nad pain & vin Willame
 Vncle Willame que purrai deuenir
 Falt mei le quor par fei le vus pleuis
 Ne puis mes armes manier ni tenir
 Ne mun cheual poindre ni retenir
 Si io moerc co ert doels & perilz
 Dunc ne remaindrat gueres de mun lin
 Nies dist Willame mult en sui entrepris
 Sauriez vus aler al meisnel
 V nus trouamès lunsdi les sarazins
 La v il esteient a lur manger assis
 Co i remist que ne sen pout fuir
 Que fu co uncle pain & char & vin
 Alez i nies co li dist li marchis
 Mangez del pain petit beuez del vin

1775

k

Puis si me socurez al dolerus peril
 Ne me ublier mult sui en tei fis
 Iloec deseurerent entre Willame & Gui
Lores fu mecresdi
 Quant senturnad Gui li enfes .
 Par la terre al meisnel pur la uiande quere
 Païen la cuillent as cheuals de la terre
 Mult lur ert loinz quant fu hors de la terre
 Quant païen ueient que nel ateindrunt en fui
 Lessent le aler de Mahomet lunt maldit
 Cist nus querrat co que Girard nus quist
 Quant il Willame nus amenat ici
 Cist vait en france pur le rei Lowis
 Turnum arere al dolerus peril
 Cil qui de la est ne retournerat ia vif
 Dunc corurent sur Willame le marchiz
 & Guiot vait tut dreit al meisnil
 Si descendi del cheual v il sist
 Mangat del pain mes co fu petit
 Vn grant sester but en haste del vin
 Puis est munte si acuilli sun chemin
 & paens uenent & turs & sarazins
 Si acuillent Willame le marchis
 Li quons Willame quant il les ueit uenir
 Crie Munioie sis vait tuz enuair

1800

A sul sespee en ad seisante ocis
 Si cum paiens li furent de totes parz
 Si li lancent lur guiures & lur darz
 & lur & lur espee trenchanz
 Entre les quisses li gettent mort Liard
 Es vus a pe le noble uassal
 Il traist sespee uaissalment se combat
Si cum paiens lunt si acuilliz
 Lancent li lances & lur trenchanz espee
 Tant en abatent en sun escv a quarters
 Quenvers sa teste ne pout mie drescer
 Encontre terre mistrent le cheualer
 Tote la forme repert el grauer
 Granz colps li donent de lances & despees
 Forte est la broine quant ne la poent desmailler
 Par mi la gule li fun le sanc raier
 Dunc huche & crie vien Gui bels nies
 Securez mei si vnques fus cheualers
 I dunques repeirout li enfes qui out mange
 Encontreual lescri entendi ben
Quant Gui li enfes deualad la terre
 Si oit Willame crier en la press
 Fiert un paie sur la duble targe nouele
 Tote li fent & froisse & encantele
 Sun bon halberc li defrunt & deserre

Mort le trebuche del cheual a terre
 Crie Munioie & dist vis vncles Willame
 Puis fiert un altre sur la targe nouele
 Tote li fent & fruisse & escantele
 & sun halberc li runt & desmaele
 Colpe le piz sur la large gonele
 Que mort le trebuche des arcuns de la sele
 Crie Munioie vis vncle Willame
 Puis fert le terz sur la targe duble
 Tote la fent desus iusque a la bocle
 Les asteles lenferent suz la gule
 Sun grant espee al grauer li met vltre
 Que los del col li bruse & esmuille
 Tres ses espalles lenseigne li mist vltre
 Quant li gluz chai la hanste li estruse
 A icel colp la bon espee mustre
Qui traist lespee dunc fu cheualer
 Lamure en ad contremunt dresce
 Fert vn païen sus en le halme de sun chef
 Tresque al nasel li trenchad & fendit
 Le meistre os li ad colpo del chef
 Grant fud li colps & Guiot fu irez
 Tut le purfent desque enz al baldre
 Colpe la sele & le dos del destrer
 En mi le champ en fist quatre meitez

De cel colp sunt paien esmaiez
Dist li vns al altre co est fuildre que cheit
Reuescu est Viuien le guerreier
Turnent en fuie si vnt le champ laissie
Dunc se redrescat Willame de sur ses pez
& li quons Willame fud dunc punners
Qo fu grant miracle que nostre Sire fist
Pur un sul home enfuient uint mil
Dreit a la mer senturnent sarazin
Dunc se redrescat Willame le marchiz
Sis enchascèrent as espees acerins
Si cum paiens senfuient vers la mer
Li ber Willame est sur pez leuez
Sis enchascèrent as espees desliez
Gui vit sun uncle el champ a pe errer
Le cheual broche si li est encontre ale
Sire dist il cest cheual muntez
Guiburc ma dame le me prestad de sun gre
Gui descent & Willame i est munte
Quant il fu sus comencad a parler
Par ma fei nies tu as pur fol mene
Laltrer me diseies que li eres eschape
Ore me dis que sun cheual tad preste
Qui te comandat ma muiller encuser
Co respunt Gui vnc mais noi tel

Poignez auant dreitement a la mer
 Ia sen serrunt li sarazin ale
 A cel colp sa bone espee mustre
Li bers Willame cheualche par le champ
 Sa espee traite sun healme va enclinant
 Les pez li pendent de suz les estrius a lenfant
 A ses garez li vint les fers batant
 & tint sa espee entre le punz & le brant
 Del plat la porte sur sun arcun deuant
 & Balcan li vait mult suef amblant
 & Gui sis nies le vait a pie siuuant
 Dures enaltres desqual genoil el sanc
 Reis Derame giseit en mi le champ
 Enuolupe de sablun & de sanc
 Quant Willame le veit sil conuit al contenant
 Quidat li reis quil eust pris de darz tel haan
 Quenvers nul home ne fust mes defendant
 Ore se purpense de mult grant hardement
 Sur piez se dresce si ad pris sun alferant
 Ostad la raisne del destre pe deuant
 Prist sun espe qui fu bone & trenchant
 De plaine terre sailli sus al alferant
 Dreit vers els en est ale brochant
Li bers Willame vit le paien venir
 Le cors escure la grant hanste brandir

1900

& il tint sespee deuant en mi le vis
 Dunc len esgarde li reis de sarazins
 Le cure leist al petit pas sest mis
 A vncl Willame dist sun petit nevov Gui
 Ore pri vus sire pur la tue merci
 Que vus me rendez mun destrer arabi
 Si iusterai al culuert sarazin
Uncle sire car me faites buntez
 Vostre merci mun cheual me rendez
 Si iusterai al païen dultre mer
 Nies dist Willame folement as parle
 Quant deuant mei osas colp demander
 Nel fist mais home qui de mere fust ne
 Puis icel hure que io soi armes porter
 Ico ne me fereit mie mis sire Lowis le ber
 Sa mespee li peusse un colp doner
 Venge serreie del paen dultre mer
 Lores fu mecredi le petit pas prist Derame
 Willame fiert le païen en le healme
 Lune meite len abat sur destre
 Del roiste colp senclinat vers tere
 & enbracad del destrer le col & les rednes
 Al trespasant le bon cunte Willame
 Tute la quisse li trenchad de sur la sele
 & del altre part chiet li bucs a la terre

1925

Dunc tendi sa main li bons quons Willame
 Si ad pris le corant destrer a la raisne
 Vint a Guiot sun neuv sil apele
Le sarazin se iut en mi le pre
 Si uit Willame sun bon cheual mener
 & il le comence tant fort a regretter
 Ohi Balcan que io vus poei ia tant amer
 Io te amenai de le rive de mer
 & il qui ore te ad ne te seit pruz conreier
 Ne costier ne seigner ne ferrer
 Glut dist Willame laisiez cest sermun ester
 & pren conseil de ta quisse saner
 & io penserai del bon cheual garder
 Vint a Gui & si li ad presente
Li sarazin out al quor grant rancune
 Ha Balcan bon destrer tant mar fustes
 Vostre gent cors & voz riches ambleures
 La me portas v ma cuisse ai perdue
 Tantes batailles sur vus ai vencues
 Meillur cheual nad sur ces nues
 Paene gent en auront grant rancune
 Glut dit Willame de ta raisun nai cure
Li bers Willame vait par mi le pre
 Le bon cheual ad en destre mene
 Gui apele & si li ad presente

1950

Bels nies sur cest cheual muntez
 Si me prestez le uostre par tun gre
 & vus muntez sur cest qui fu Derame
 Ke cest v io sez mest mult atalente
 Bels sire unches fai mei dunc bunte
 Vostre merci ma sele me rendez
 Si prenez cel del cheual Derame
 Respunt Willame co te ferai io asez
 Dunc descent a terre pur les seles remuer
 Tant dementres cum Willame remout les seles
 Gui vit le rei trauailler sur lerbe
 Trait ad sespee si li colpad la teste
 De cele chose se corozat mult Willame
 A glut lecchere cum fus vnc tant ose
 Que home maigne osas adaser
 En halte curt te serrad repruue
 Co respunt Guiot vnc mais noi tel
 Sil naueit pez dunt il peust aler
 Il aueit oilz dunt il poeit veer
 Si aueit coilz pur enfanz engendrer
 En sun pais se fereit uncore porter
 Si en istereit eir Derame
 Quen ceste terre nus querreit malte
 Tut a estrus se deit hom deliurer
 Nies dist Willame sagement toi parler

1975

Cors as denfant & raisun as de ber
 Apres ma mort ten tote ma herite
 Lores fu mecredsi
 Ore out vencu sa bataille Willame
Li quons Willame cheualche par le champ
 Tut est irez & plein de maltalant
 Rumpit les laz de sun healme luisant
 Envers la terre li vait mult enbronchant
 Sa bone enseigne teinte en vermeil sanc
 Mult grant damage troue de sa gent
 Guiot le vait de loinz adestrant
 Viuien troue sur un estanc
 A la funteine dunt li duit sunt bruiant
 Desuz la foille dun oliuer mult grant
 Ses blanches mains croisies sur le flanc
 Plus suef fleereit que nule espece ne piment
 Parmi le cors out quinze plaies granz
 De la menur fust morz uns amirailz
 V reis v quons ia ne fust tant poanz
 Puis regrette tant dolerusement
 Viuien sire mar fu tun hardement
 Tun uasselage ta pruesce tun sen
 Quant tu es mort mes nai bon parent
 Naueraï mes tel en trestut mun viuant
Viuien sire mar fu ta iuuenta bele

2000

Tis gentil cors & ta teindre meissele
 Io tadubbai a mun palei a termes
 Pur tue amur donai a cent healmes
 & cent espees & cent targes noueles
 Ci vus uei mort en larchamp en la presse
 Trenche le cors & les blanches mameles
 & les altres od vus qui morz sunt en la presse
 Merci lur face le ueir Paterne
 Qui la sus maint & ca ius nus gouerne
A la funtaine dunt li duit sunt mult cler
 De suz la foille dun grant oliuer
 Ad bers Willame quons Viuien troue
 Parmi le cors out quinze plaies tels
 De la menur fust morz vns amirelz
 Dunc le regrette dulcement & suef
 Viuien sire mar fustes vnques ber
 Tun vasselage que Deus taueit done
 Nad uncore gueres que tu fus adube
 Que te pleuis & iuras Dampnedev
 Que ne fuereies de bataille champel
 Puis couenant ne noisis mentir Dev
 Pur co ies ore mort ocis & afole
 Dites bel sire purriez vus parler
 & reconuistre le cors altisme Dev
 Si tu co creez quil fu en croiz penez

En malmonere ai del pain sacre
 Del de meme que de sa main saignat Deus
 Se de vus le col en auet passe .
 Mar crendreies a chaisun de malfe
 Al quons reuint & sen & uolente
 Ouri les oilz si ad sun uncle esgarde
 De bele boche comencat a parler
 Ohi bel sire dist Viuien le ber
 Ico conuis ben que ueirs & uifs est Dev
 Qui uint en terre pur sun pople saluer
 & de la Uirgne en beleem fu nez
 & se laissad en sainte croiz pener
 & de la lance langis fu fore
 Que sanc & eve corut de sun le
 A ses oilz terst sempres fu enlumine
 Merci criad si li perdonad Deus
 Deus mei colpe des lore que fu nez
 Del mal que ai fait des pecchez & de lassetez
 Vncle Willame un petit men donez
 A dist le cunte a bon hore fui nez
 Qui co creit ia nen ert dampnez
 Il curt al eve ses blanches mains a lauer
 De salmosnere ad trait le pain segre
 Enz en la boche len ad un poi done
 Tant fist le cunte que le col en ad passe

Lalme senuait le cors i est remes
Veit le Willame comence a plurer
De sur le col del Balcan lad leue
Qui len uoleit a orange porter
Sur li corent sarazin & escler
Tels .xv. reis qui ben vus sai nomer
Reis Mathamar & uns reis Dauer
& Bassumet & li reis Defame
Soldan dalfrike & li forz Eaduel
& Aelran & sun fiz Aelred
Li reis Sacealme Alfame & Desturbed
& Golias & Andafle & Wanibled
Tuz .xv. le ferent en sun escu bocle
Pur un petit nel vnt acraunte
Quant veit Willame que ne purrad endurer
Colche len ad a tere sil comandad a Dev
Mult vassalment sest uers els turne
& ces .xv. lunt del ferir ben haste
Que par uife force unt fait deseurer
Luncle del neuov quil poeit tant amer
Puis vnt sarazins Guiot enuirone
& sun cheual suz li li unt mort get
& li enfes est a tere acraunte
A Deus quel duel quant li vassal cher
Sur li corent treis cent a espees

Si vnt lenfant pris & estreit liez
 Veant Willame qui mult lad regrette
 & Deus fait qui mains en trinite
 & gouernes terre & ciel esteille
 Cum se uait declinant ma grant nobilite
 & cum est destruit tut mun riche parente
 Gui amis ore es enprisone
 Cil vus deliure qui se lascia pener
 Al iur de uendresdi pur crestiens saluer
 Par deuant le cunte lunt mene as niefs
 & li quons Willame sest mult adolusez
 Turne as sarazins cum hom qui est irrez
 Quinze en ad morz & .lx. nafrez
 Si que nuls pout ester sur ses piez
Lunsdi al uestre
 Morz sunt franceis & pris a males pertes
 Ne remaint cheual ne home en sele
 Enz en larchamp remist tut suls Willame
 Fors Dampnedev de tuz les homes de terre
 Quant Alderufe le vint brochant sur destre
 Vint lui deuant en mi le vis lenfeste
 Vus nestes mie Bertram ne Willames
 Ne Guielin ne dan Walter de termes
 Ne Gischarde ne Girard quis cadele
 Ne parez mie dicele fere geste

Par ma fei dist li quons un de cels deuoe estre
Dist Alderufe ne men cheut par ma destre
Qui quen seez ancui perdras la teste
Ne te garreit tut li ors de palerne
Co ert en Deus dist li marchis Willame
Sarazin frere quant tu te uols combatre
Ke me dites ore de quele chose me blames
Si tai fait tort prest sui que dreit ten face
Sil uols receiure io ten doins mun gage
Dist Alderufe sez dunt te ared Willame
Que home & femme crestie ne deiuent estre
Nule baptisterie ne deit auer en terre
A tort le prent qui le receipt sur la teste
Cele baptisterie ne valt mie une nife
Deus est el ciel & Mahomet en terre
Quant Deus fait chaud & Mahomet yuerne
& quant Deus plut Mahomet fait creistre lerbe
Qui uiure uolt congie nus en deit quere
& a Mahomet qui le secle gouverne
Ne sez que diz dist li quons Willame
Culuert païen mult auez dit grant blame
Co escondi io que issi ne deit estre
Meillur est Dev que nule rien terrestre
Point Alderufe dunc broche Willame
Si sentreferent sur les targes noueles

Dun ur en altre les freignent & deserrent
 & lur halbercs desrumpent & desmaillent
 Iambes leuees chet li marchis Willame
 & Alderufe trebuche sur lerbe
 Ne pout tenir ne cengle ne seele
 Tut le nasele ne len fierge en terre
 Les plantes turnent cuntre curt celestre
Li sarazin Alderufe fu hardiz & pruu
 Cheualer bon si out fere uertuz
 Mais Deu ne nout par tant est il tut perdu
 Ainz creit le glut Pilate & Belzebu
 & Antecrist Bagot & Tartarin
 & denferu le ueil Astarut
 Tut premereins sur ses peiz salt sus
 Li quons Willame si est sure coruz
 Trait ad Ioiuse qui a Charlemaigne fu
 Li sarazin fu granz & corporuz
 Halte out la teste si out mult long le bu
 Ni pout ateindre par de suz ad feru
 Tote la quisse li deseuerad del bu
 De de sur lerbe est li pie chau
 & del altre part est trebuche le bu
 Frere dist Willame quen ferreie io plus
 Escacher es nest mais ioie de ta uertu
 A Florescele est al estriu uenv

Quant saisi ad larcun li bers si muntad sus
 Sil ad broche des esperuns aguz
 & il li salt par force & de vertv
 A dist Willame mult ben mad mun Dev vev
 Sun champiun deit estre maintenv
 Qui ben le creit ia nen ert confundv
 Cest cheual nert hui mais co quid rendu
 Lunsdi al vespre
 Ben mad uev mun Deu co dist Willame
 Cist ualt tut lor al sire de palerne
 & uint a Balcan lores li trencha la teste
 Quant il lout mort gentilmente le regrette
 Ohi Balcan a quel tort tai ocis
 Si Dev mait unc nel forfesis
 En mile guise ne par nuit ne par di
 Mais pur co lai fait que ni munte sarazin
 Franc cheualer par vus ne seit honi
 Muat sa ueie & changat sun latin
 Salamoneis parlat tieis & barbarin
 Grezeis alemandeis aleis hermin
 & les langages que li bers out ainz apris
 Culuerz paiens Mahun vus seit failli
 Li bers Willame mult en i ad ocis
 Ainz quil senturt lur getad morz set vinz
 Li quons Willame cheualche par grant ferte 2175

m

Cum pruuuz quons de grant nobilite
& Alderufe se iut en mi le pre
Sun Balcan ad puis regarde
Ohi Florecele bon destrer honored
Mieldre de vus ne poei unques trouer
Ia fustes vus al fort rei Derame
Io te menai en larchamp sur mer
Pur gent colp ferir & pur mun cors aloser
Willame tameine si ad mun quer vergunde
A ses diables le peusse io comander
Ahi Willame quel cheual en menez
Fuissez home quil seusse garder
Il nen ad si bon en la crestiente
Nen paesnisme nel purreit len recourer
Rend le mei sire par la tue bunte
Par quatre feiz le ferai dor peser
Del plus fin darabie & del plus cler
Quant lot Willame rit sen suz sun nasel
Pense fols reis de ta quisse saner
De faire escache cum tu puisses aler
& le crochet & le moinum ferrer
Io penserai del cheual conreier
Cum li home qui le couine en set
Io en ai eu maint bon la merci Deu
Ohi Florescele bon cheual de nature

2200

Vnc de destrier ne vi tel criature
 Itant ne curt uent cum tu vas lampleure
 Ne oisel ne se tient uolure
 La mas porte v ma cuisse ai perdue
 Willame te meine & io ai la hunte eve
Lunsdi al vespre
 A ces paroles est turne Willame
 Vint al paien lors li trenchat la teste
 Dunc se parcurent li paien de palerne
 & de nichodeme dalfrike & de superbe
 Dreit a orange les paiens de la terre
 Vont chascant le bon marchis Willame
 Vint a la porte mais nel trouat mie ouerte
 Serrement le porter en va apeler
 Ohi porter frere lai mei la iuz entrer
 Qui estes vus co est Willame al curbnies
 Dist le porter certes vus ni enterez
 Ainceis lauerai a ma dame cuntez
 Va dunc frere gard ne demorez
 & il munte les marbrins degrez
 Ahi Guiburc franche par la fei que dei Dev
 A cele porte ad un cheualer tel
 Mult par est granz & corsuz & mollez
 Tant par est fer nel osai esgarder
 Si dist quil est Willame al curbnies

Mais ne li uoil la porte desfermer
Car il est sul od lui nad home ne
Si cheualche un alferant tel
Il nad si bon en la crestiente
Nen paenissime nel poet hom recourer
Paenes armes li pendent al costez
Co dist la dame iol conuistrai assez
Sil est ico sil larrum entrer
Ele meisme deualat les degrez
& vint al cunte sil ad araisez
Ki estes vus qui a la porte clamez
Dame dist il ia me conuissiez asez
Ia est co Willame le marchis al curbnies
Co dist Guiburc vus nus mentez
Culuert paen mult sauez controuer
Par tels enseignes ca enz nen enterez
Car io sui sole od mei nad home nez
Si vus fuissez Willame al curbnies
Od vus uenissent set mile homes armez
Des frans de france des baruns naturels
Tut entur vus chantassent ces iuglers
Rotes & harpes i oist hom soner
Allas pecchable dist Willame al curbnies
A itele ioie soleie io ia aler
Dame dist il ial le sauez vus assez

Tant cum Deus uolt ad home richete
& quant li ne plaist si rad pouerte
Ia repair io del archamp sur mer
V ai perdu Uiuien lalose
Mun niefs Bertram i est enprisone
Le fiz Bernard de bruban la cite
& Guielin & Guischard lalose
Guiburc regarde tut un chemin ferre
Si ueit uenir set mille paiens armez
De dulce france repeirent de prier
De saint martur de turonie gaster
Le maistre cumble en vnt acraunte
Si ameynent cent chaitifs enchaïne
Souent les batent od fustz & od tinels
A lur escurges & a lur flagulers
Veit le Guiburc comence a plurer
Se vus fuissez Willame al curbnies
Ia fust escuse sainte crestientez
& cele prie qui meinent cels lecchers
A dist le cunte unc mais noi tel
Tut ueirement me uolt espermenter
V moer v uiue la mestoet aler
Dunc point & broche le destrer abriue
Cil curt plus tost que oisel ne pot uoler
Païen le ueient mult lur fu ame

Dist li vns al altre io uei nostre auove
Reis Alderufe de palerne sur mer
Qui a orenge alad assalt doner
Bons est li Deus qui len ad amene
Quant nel ad mort Willame al curbnies
Desore deuom Mahomet aorer
& Apolin & Bagot & Macabev
Tant dementers quil vnt aore
Li quons Willame nest mie seiurne
Car le primer quil ad encuntre
En apres laltre si fait le chef uoler
& puis le quart unc ne passad perel
Quinze en ad mort Willame dun ester
Dist li uns al altre or est il vif malfez
& dist li autres mult grant tort en auez
Mais mis sires est uers vus a duler
Pur la bataille del archamp sur mer
Nus auom ensemble od lui este
& cuillent ent fuie sarazins & esclers
Tote la preie li vnt abandone
Veit le Willame sin ad Dev aore
Il la rent tut as chaitifs del regne
Li quons Willame laisse cure sur destre
Si vait Corberan ferir doliferne
Lescu li freinst & le halberc li deserre

2300

Pleine sa hanste labat mort a tere
 Dame Guiburc lesgarde dunes de fenestres
 Dunque reparlad si ad dite parole ueire
 A icest colp resemblez vus Willame
 Venez vus ent ia ert la porte ouerte
Li gentil cunte reuint a la cite
 & Guiburc dame me larrez vus entrer
 Nenil dist ele par la fei que dei Dev
 Se ne me mustrez la bosce sur leues
 Que auait Willame le marchiz od le curb nes
 De la bataille reis Tebald lescler
 & plusurs homes se ressemblent assez
 De uasselage & de nobilitez
 & io sui sule od mei nad home nez
 Fors cest porter que ci ester veez
 Co dist le cunte vnques noi tel
 Mult maurad hui cest aduerser pene
 Deslace les laz de sun healme gemme
 Tres ses espalles le lait a ual culer
 Trestui sun vis li ad abandone
 Veit la dame sil conuit assez
 Del quor suspire des oilz prent a plorer
 Ami bel frere la porte li ourez
 Ia est co Willame mun seignur naturel
 Lunsdi al uespre

Ourerent la porte si recoillent Willame
Grant piece est quil i uolsist estre
Ui quons Willame al perun descendi
Dame Guiburc recut sun destrer
Sil amenat la ius en un celer
& frein & sele li ad oste primer
Foer & aueine li donat a manger
Puis lad couert dun bon paille pleie
Puis vait le cunte a coler & baiser
Si len apele curteisement & ben
Sire dist ele quas tu fait de ta gent
Dunt tu menas quatre mil & .vii. cent
Par ma fei dame uencu les vnt paens
Bouches sanglantes gisent en larchamp
Sire dist ele que auez fait de Uiuiens
Par fei dame ia est morz & sanglanz
Quant Guiburc lot mult out le quer dolent
Sire fait ele quas tu fait de Bertram
Le fiz Bernard de la cite de brusban
Seor bele amie mult i fu combatanz
A quinze esturs i fu pleners el champ
Al sezime len donerent tant
Suz li oscistrent sun destrer alferant
Il trais sespee mist lescv deuant
Si lur trenchad les costez & les flancs

Iloec le pristrent la pute aduerse gent
 Si li lierent les piez & les mains
 Mes oilz ueanz le mistrent en vn chaland
 Par mei nout vnques socurs ne garant
 Deus dist la dame quel duel de Bertram
 Pur co me peise que iol amoue tant
Sire dist ele quas tu fait de Guiotun
 Le bel enfant od la gente facun
 Io li chargai lenseigne al rei Mabun
 & le destrer Oliuer le gascun
 & le halberc & le healme Tebbald le clauun
 Par ma fei dame dedenz i fu cum pruu
 En la bataille portad le gunfanun
 Si i fu ben desqual sezime estur
 I dunc le pristrent li sarazin felun
 Sil le lierent & les piez & les poinz
 Mes oilz ueanz le mistrent en un dromunz
 Par mei nout unques aie ne socurs
 Deus dist la dame quel duel & quel tristur
 Pur co me peise que iol amoue mult
Sire quas tu fait de Walter
 De Guielin & del cunte Reiner
 Par ma fei dame uencv les vnt paiens
 Enz en lur barges les tenent en liens
 Deus dist la dame quel duel & quel pecche 2375

n

Si cum tu diz ne repeire vn pe
 Leue tes mains sire si alez manger
 Des hui matin le tai fait apareiller
 Auer en poez a quatre mil cheualer
 & a les serganz & a tuz les esquiers
 Allas pecchable dist Willame li bers
 Vncore nen ad mie que dous iurz enters
 Que io auei ben pres de .xv. miller
 & ore sui ca enz ne mes ke sul mei tierz
 En petit hore ai grant desturbers
Dunc prent samie par les mances de paille
 Sus munterent les degrez de marbre
 Ne trouent home que seruice lur face
 Dame Guiburc li curt apporter leve
 & apres li baillad la tuaille
 Puis sunt assis a la plus basse table
 Ne poeint de duel seer a la plus halte
 Il ueit les bancs les formes & les tables
 La v soleit seer sun grant barnage
 Il ne vit nul iuer par cele sale
 Ne deporter od esches ne od tables
 Puis les regrette cum gentil home deit faire
Ohi bone sale cum estes lung & lee
 De totes parz vus uei si aurne
 Beneit seit la dame qui si tad conreie

Ohi haltes tables cum estes leuees
 Napes de lin vei desure getees
 Ces escuiles emplies & rasees
 Des hanches & despalles de niueles & de obleies
 Ni mangerunt les fiz de franchises meres
 Qui en larchamp vnt les testes colpees
 Plure Willame Guiburc sest pasmee
 Il la redresce si lad confortee
Guiburc dame vus nauez que plurer
 Ke nauez perdu nul ami charnel
 Io dei le duel & la tristur demener
 Ki ai perdu mun gentil parente
 Ore menfuierai en estrange regne
 A saint michel al peril de la mer
 V saint pere le bon apostre Dev
 V en un guast v ia mes ne seie troue
 La deuendrai hermites ordene
 & tu deuien noneine si faz tun chef ueler
 Sire dist ele co ferum nus assez
 Quant nus aurom nostre siecle mene
Sire Willame al Dampnedev congie
 Par main al albe munte sur tun destrer
 Dreit a loun pense de cheualcher
 A lempere qui nus solt auer chiers
 Qui del socurs nus uienge ca aider

& sil nel fait si li rendez sun tee
 Mar entendre un iur vn demi pee
 Met en pruuende & tei & ta moiller
 V a sa table nus laist pur Dev manger
 A chascun iur de sun pain dous quarters
 & dit Willame iol ferai mult iree
 Mais tun conseil en dei io creire ben
 En plusurs lius mad eu mult grant mester
 A icele mut sest Willame colchie
 Par mein al albe muntad le bon destrer
Seor bele amie tun conseil ai creu
 Ore men irrai a la sale alui
 Que lempere del socurs nus enueit
 Se dunc se sunt paiens aperceuz
 Ben tost mauerunt cest bon paleis toluz
 A morauinz & pincenarz & turs
 Qui me defenderat le terrail & les murs
 Sire dist ele Ihesu & ses uertuz
 & set cenz damas que ai ca enz & plus
 As dos auront les blancs halbercs uestuz
 & en lur chefz uerz healmes aguz
 Si esterrunt as batailles la sus
 Lancerunt lances peres & pels aguz
 En petit de hure serra co trescorv
 Si Deus le uolt si serrad le socur uenv

2450

Ahi dist Willame cel Seignur te aiut
 Qui la sus maint & ca ius fait vertuz
Tait sen Willame Guiburc remist plorant
 Vn esquier menat co fu un enfant
 Tant par fu ioefnes nout vncore .xv. anz
 La hanste fu grosse si li pesad formanz
 & li escuz vers la terre trainant
 Dures enaltres fors des arcuns pendant
 Veit le Willame merueillus duel len prent
 Totes les armes ad pris del enfant
 Quant il encontre rumi v marchant
 V uient a chastel v a uile errant
 Totes ses armes rebaille al enfant
 Quant il sunt ultre a sun col les prent
 Tote iur plure pur sun neuov Bertram
 Pur Guilin & pur le quons Viuien
 Si faitement vait sun duel demenant
 Tresque loun al perun v il descent
 Del or despaigne lur soleit porter largement
 Pur la folie i curent ore tanz
 Vnques les trente ni conquistrent tant
 Ne les seisante ni achatent nient
 Dunt entrels tuz eslegassent vn gant
Quant veit Willame les legers bagelers
 Del or despaigne li uienent demander

Car il lur soleit les anels doner
Seignurs ne me deuez blamer
Or & argent ai io vncore assez
En oronge ma mirable citez
Si Dev mait nel poei apporter
Car io repair del archamp sur mer
V io ai perdu Viuien lalosed
Mun nevov Bertram i est enprisone
Walter de termes & Reiner le sene
& Guielin & Guischard al vis cler
Sule est Guiburc en la bone cite
Pur Dev vus mande que vus le socurez
Quant cil oirent del damage parler
Laissent la resne al destrer soiurne
Tote la place li vnt abandone
Turnent al paleis asseent al manger
Ancui sauerad Willame al curbnies
Cum poures hom pot uers riche parler
& que les denrees lum fait de cunsiler
Li reis demande v est Willame ale
& cil li dient ia est el perun remes
Les vis diables les nus vnt amene
Si cum il dit mal li est encuntre
& dist li reis laissez le tut ester
Le gentil cunte ne vus chaut a gaber

2500

Alez i tost & sil mamenez
 Volenters sire quant vus le comandez
 Willame munte le marbrins degrez
 Li reis le beise sil aset al digner
 Quant ad mange sil prist araisuner
 Sire Willame cum faitement errez
 Ne vus vi mais ben ad set anz passez
 Ne sanz bosoig ca sai ne me requerez
 Sire dist il ial sauez vus assez
 Io aueie espaigne si ben aquitez
 Ne cremeie home que de mere fust nez
 Quant me mandat Viuien lalose
 Que io menasse de orenges le barne
 Il fu mis nies nel poeie veier
 Set mile fumes de cheualers armez
 De tuz icels ne mest un sul remes
 Perdu ai Viuien lalosed
 Mis nies Bertram i est enprisone
 Le fiz Bertram de brusban la cite
 & Guielin & Guischard al vis cler
 Sule est Guiburc en la bone cite
 Pur De vus mande que vus la socurez
 Vnc li reis nel deignad regarder
 Mais pur Bertram comence a plurer
Lowis sire mult ai este pene

En plusurs esturs ai este trauaille
Sole est Guiburc en orange la see
Pur Dev vus mande que socurs li facez
Co dist li reis nen sui ore aisez
A ceste feiz ni porterai mes piez
Dist Willame qui enchet ait cinc cenz de hez
Dunc traist sun quant qui a or fu entaillez
A lempere lad gete a ses piez
Lowis sire ci vus rend voz feez
Nen tendrai mais vn demi pe
Qui que te plaist le refai ottrier
En la sale out tels quinze cheualers
Freres & uncles parenz cosins & nies
Ne li faldrunt pur les testes trencher
Del altre part fu Rainald de peiter
Vn sun neuov de sa sorur primer
A halte uoiz comencat a hucher
Nel faites uncle pur les uertuz del ciel
Fiz a barun retien a tei tun fe
Si Dev me ait qui le pople maintient
Io ne larrai pur home desuz ciel
Que ne tameine quatre mille cheualers
A cleres armes & a alferanz destrers
& Deus dist Willame vus me uolez aider
Fel seit li uncles qui bon nevov nad cher 2550

Del altre part fu Hernald de girunde
 & Neimeri sun pere de nerbune
 Li quons Garin de la cite dansune
 Dist li uns al altre ore feriuns grant hunte
 De nostre ami si le laissum confondre
 Dist Neimeri sun pere de nerbune
 Io ne larrai pur rei ne pur cunte
 Que ne li meine set mile de mes homes
 & io quatre mile fait Garin dansune
Co dist Boeues de somarchiz quons la cite
 Io sui sun frere se ne li puis faillir
 Io ne larrai pur home qui seit vif
 Que ne li ameine cheualers quatre mil
 & io treis fait Hernald le flori
 & io dous fait li enfes Guibelin
 Seignurs co dist de flandres Baldewin
 Li quons Willame est prudome & gentil
 Si ad ame ses pers & ses veisins
 Si socurist les si les vit entrepris
 Io ne larrai pur home qui seit vis
 Que ne li amein cheualers mil
 Alum al rei si li crium merci
 Que de socure Willame nus aid
Tuz ces baruns deuant le rei uindrent
 Cil Baldewin li comencat a dire

Forz emperere pur Dev le fiz Marie
Veez de Willame cum plure & suspire
Teint ad la charn suz le bliaut de sirie
Co ne fu unques pur nule coardie
Sule est Guiburc en orenge la vile
Ore lassailent li païen de furie
Cil de palerne & cil de tabarie
Sil vnt orenge puis vnt espaigne quite
Puis passerunt as porz desuz saint gille
Sil vnt paris puis auront saint denise
Fel seit li home qui puis te rendrat seruise
Co dist li reis io irrai me meisme
En ma compaignie cheualers trente mille
Nu ferez sire co respunt la reine
Dame Guiburc fu ne en paisnisme
Si set maint art & mainte pute guische
Ele conuist herbes ben set temprer mescines
Tost vus ferreit enherber v oscire
Willame ert dunc reis & Guiburc reine
Si remaindreie doleruse & chaitive
Ot le Willame a poi nesraga de ire
Quas tu dit Dampnedev te maldie
Pute reine vus fustes a nuit irere
Il siet assez vnc ne li baisai mie
Tant par sunt ueires lermstes felonies

2600

Enz en larchamp que vus auez oi dire
 Qute reine pudueise sur parlere
 Tedbald vus fut le culuert lecchere
 & Esturmi od la malueise chere
 Cil deussent garder larcham de la gent paene
 Il sen fuirent Viuien remist arere
 Plus de cent presters vus vnt ben coillie
 Forment vus vnt cele clume chargee
 Vnc ni volsistes apeler chambrere
 Pute reine pudueise sur parlere
 Mielz li uenist quil te ust decolee
 Quant tote france est par vus auilee
 Quant tu sez as chaudes chiminees
 & tu mangues tes pudcins en peurees
 & beis tun vin as colpes couerclees
 Quant es colche ben es acuietee
 Si te fais futre a la iambe leuee
 Ces leccheurs te donent granz colees
 & nus entraium les males matinees
 Sin receuom les buz & les colees
 Enz en larchamp les sanglantes testes
 Si io trai fors del feore ceste espee
 Ia vus aurai cele teste colpee
 Pe & demi lad del feore leuee
 Deuant fu Nemer de nerbune sun pere

Si li vnt dit parole menbree
Sire Willame laissez ceste mellee
Vostre sorur est mar fust ele nee
& fait li reis ben fait par Dev le Pere
Car ele parole cum femme desuee
Si io ni uois si serrad most mandee
Vint mile cheualers od nues espees
Li chargerai demain al aiurnee
Vostre merci fait Willame emperere
Nostre emperere fait ses baruns mander
Si fait ses chartres & ses brefs seeler
Sis enueit par trestuit sun regne
Dedenz les vit iurz furent vint mil armez
Estre la force Willame al curbnies
Que li chargerent ses parenz del regne
Li emperere ad Willame apele
Sire Willame dist Lowis le ber
Tut cest empire ai io pur vus mande
Sire dist Willame Dev vus en face gre
Sire emperere le congie men donez
Suz munt leun ad fait tendre sun tref
De la quisine al rei issit un bachelier
Deschalcez & en langes nout point de solders
Granz out les piez & les traineals creuez
& de sur sun col portat vn tinel

Nest ore nuls hom qui tel peust porter
Vient a Willame sil ad araisune
Sire Willame io uoil od vus aler
A la bataille del archamp sur mer
Si tuerai sarazins & esclers
& dist Willame co serreit ben assez
Ben semblez home qui tost uoille digner
& par matin nad cure de leuer
& dist Reneward de folie parlez
Si me menez en larchamp sur mer
Plus ualdray que .xv. de uoz pers
De tuz les meillurs que i auez assemblees
Co dist Willame ore auez dit que ber
Se tu uols armes io te ferai aduber
Dist Reneward ne place unques Deus
Que ia altre arme i port que mun tinel
Ne sur cheual ne quer io ia munter
Dunc vait a sun maistre le cunge demander
Maistre fait il io ai od vus conuerse
Ore vient li termes que io me uoil amender
Li quons Willame me uolt od lui mener
En la bataille del archamp sur mer
Co dist sun maistre lecchere nu ferez
Car les granz feims nem purrez endurer
Ne les haans ne les trauals que auerez

2675

Lores vus faldreient les vins & les clarez
Li pains & la char & li grant richitez
Si murriez a doel & a uilte
Pite en ai nurray vus ai mult suef
Dist Reneward de folie parlez
Ne remaindrai pur quanque vus auez
Que io nen alge al fort estur champel
Quant le maistre de lui est ale
Que il le quidat par force returner
& Reneward le fer si del tinel
Tut estendv lad al feu acraunte
Ainz quil sen leue out les geruns vdlez
Puis li ad dit maistre ci ius girrez
Desore en auant lostel garderez
Si lum i pert rien il vus ert demandez
Suz munt loun en vint corant asprez
Al pauillun Willame al curbnies
Tant le demande que lom li ad endite
En la quisine est Reneward entre
Prent feu a faire & ewe a porter
Cels li ioirent car il en solt assez
Si li donerent piment vin & clarez
Tant len donerent que tut lunt eniurez
& li leccheur li emblent sun tinel
Quant sesueillad nen ad mie trouez

Dunc se clamad chaitif & maleurez
Allas peccable tant mar fu unques nez
& li leccheur se prenent a gaber
Reneward les ad esgarderez
Fiz a putein auez le me vus emblez
Les dous primers quil ad encuntrez
A ses dous mains les ad si hurtez
Les oilz tuz quatre les fist del chef uoler
Co dist li tierz io rendrai le tinel
& dist Reneward or nen aiez vus grez
A vn feuil len vnt els mene
Vnques les dous nel purent remuer
& Renewart prent cele part aler
A un de ses mains lad en sun col leue
Sin manace sarazins & esclers
Nen guarrad pe quant io ai le tinel
Willame leue par matin quant lalbe pert
Vn greille fait mult haltement soner
Plus de seisante len responnent al pre
Reneward ot la noise del corner
Tut esturdi sailli de sun ostel
En la quisine obliad sun tinel
Ne li menbrat desque vindrent a un gue
Deuant franceis comencat a tenter
Del ewe freide ad sun vis laue

Dunc comencad del vin a deseniurer
I dunc a primes li menbrat del tinel
Pas auant altre se prent a returner
Li quons Willame len ad araisone
Reneward frere uols tu returner
En la quisine a tes hastes garder
Ainz que meussez le te di io assez
Ia nel purriez soffrir ne endurer
Nenil bel sire ne me vint en penser
Mas a lostel obliai mun tinel
Va fols lecchere laissez cel bastun estre
Enz en cel bois te ferai vn colper
A ta mesure & long & quarre
Dist Reneward ne place unques De
Suz ciel nad bois v il fust recoure
Ben ad set anz que io oi le tinel
En la quisine de loun la cite
Vnc nel vi freindre ne desercler
Co dist Willame iol frai ia apporter
Dist Reneward ore auez dit que ber
Deuant li garde & vit vn flamenc ester
Gent out le cors escheui & molle
Si cheualche un destrer abriue
Il li comandat que alt pur le tinel
Volenters sire quant vus le comandez

2750

Il point & broche tant quil vint enz al pre
Met pe a tere sil pensat a leuer
A uifs diables ad le fust comande
Al cheual munte brochant sen est turne
Tresque Willame ne uolt unques finer
Dites bel sire auez vus le tinel
Nenil veirs sire unques nel poai remuer
Mal ait de la barbe qui li out oblie
& de la mere si unques le poai remuer
Dist Reneward me i couient aler
Ia ne vendrat pur nul home qui seit nez
Se les meins braz nel vnt apportez
& dist Willame io ni uoil mes seiurner
Mei que cheut si vus en alez
Mais ainz que nuit seie a vus al hostel
Les menuz salz i prent a returner
Plus tost ni fust pas vn gascoin soiurnez
De ioie rist quant il vit le tinel
Od un sul poing lad sur sun col leue
Vnc franceis ne se furent tant haster
Ainz quil fuissent al pareissir del gue
Fu Reneward deuant els al pre
Li quons Willame len ad araisone
Dites mei frere auez vus le tinel
Oil bel sire lauerei Dev merci

2775

P

Sainte Marie le mad amene
 Co comprunt sarazin & escler
 Ne garrad pe quant io lai recoure
 Lunsdi al uestre
 Car cheualchez si alum bataille quere
 Quant nus uendrum en larchamp en la presse
 Fuiz sen serrunt li païen de palerne
 De nichodeme de alfrike & de superbe
 Dient franceis cist lecchere se desue
 Bataille quert & Deus li doinst pesme
 Car as cowarz tremblout la bouele
 & les vassals safichouent es seles
 & as destrers abriuez de chastele
 Willame cheualche les plus & les vals
 & les muntaines que pas ne se targat
 Vint a orengue que forment desirad
 A un perun descent de sun cheual
 Dame Guiborc les degrez deualad
 Par grant amur la franche li baisad
 Puis li demande quas tu en france fait
 Neut el que ben madame si vus plaist
 Vint mil homes en amein ben & mais
 Que lempereur de france me chargeat
 Estre la force de mi parent leal
 Quarante mille la merci Dev en ai

2800

Ne vient il dunc . nun dame. co mest laid
Malade gist a sa chapele a es
& dist Guiburc cest vers auez vus fait
Sil ore gist ia na releue il mes
Ne uoille Dev qui tote rien ad fait
Willame munte le marbrin paleis
A sun tinel Reneward vait apres
Cels qui lesgardent le tienent pur boisnard
& as quanz le crement que trestuz les tuast
Willame munte les marbrins degrez
& Reneward le siut od sun tinel
Dame Guiburc lemprist a esgarder
Vint a Willame conseilad li suef
Sire dist ele qui est cest bachelier
Qui en sun col porte cest fust quarre
Dame dist il ias est vn bageler
Vns ioefnes hom que Deus mad amene
Sire dist ele estuet le nus doter
Nenal ueir ben i poez parler
& ele le traist a un conseil priue
Ami dist ele de quele terre es tu ne
& de quel regne & de quel parente
Dame dist il despaigne le regne
Si sui fiz al fort rei Derame
& Oriabel est ma mere de ultre mer

Cum auez nun Reneward mapelez
 Guiburc loi sil le reconuit assez
 Del quor suspire des oilz comence a plorer
 & dist la dame cest nun mest mult priue
 Vn frere oi io que se le fist clamer
 Pur la sue amur te ferai io adubber
 Cheual & armes te ferai io doner
 Dist Reneward ne place unques Dev
 Que ia altre arme i porte que mun tinel
 Ne sur cheual ne quor io ai munter
Ami bel frere io vus adoberai
 Cheuals & armes par matin vus durrai
 Ne place Dev dame dist Reneward
 Suz ciel nad rien qui tant hace cum cheual
 Ami dist ele vne espee porterez
 Coment que auienge de cel uostre tinel
 Que sil ueolt fraindre ne esquisser
 Que al coste i puissez tost recourer
 Dame dist il ma espee me donez
Dame Guiburc li aportad lespee
 Dor fu li punz dargent fu neelee
 Ele le ceinst & il lad mult esgardee
 Il ne sout mie que fuissent sorur ne frere
 Nenel sauerad si ert lost deuisee
 & la bataille uencue & depanee

Li quons Willame demande le super
Que la meisne seit ben conreie
En la quisine est Reneward entre
Espee ceinte vait les hastes turner
Cels li oirent car il en solt assez
Si li donerent & piment & clare
Tant len donerent que tut lunt eniure
Dame Guiburc nel mist pas en oblier
En mi la sale ad fait sun lit parer
Cum co fust a Willame al curbnies
Reneward sun frere ad cher apelez
Amis frere en cest lit girrez
Guiburc sen vait lez Willame reposer
& Reneward ad le lit esgarde
Nel preisad mie un dener monee
En la quisine sen est colcher ale
Les lecchurs li unt sun chef usle
& tuz ses dras espris & enbrase
Quant sesueillad le fev sent al coste
Il sailli sus cum home desue
A halte uoiz comence a crier
Dolent peccable qui mad eschalde
Cum mar fui fiz al fort rei Derame
Oriabel ma mere de ultre la mer
Car mar vi unques Willame al curbnies

Qui mamenad de loun la cite
 De la quisine Lowis lonure
 Ses lecchurs me tienent en vilte
 Qui munt ma barbe & mes gernuns usle
 Li leccheur se prenent a gaber
 & Reneward les prent a garder
 Fiz a puteins auez me vus ulle
 Mar i entraistes par la fei que dei a De
 Si io puis ia vif ne mestorterez
 Od sun bastun en ad quatre tuez
 Vn en consiuit al eissir del ostel
 Par mi les reins li dona vn colp tel
 En dous meitez li ad le cors colpe
 Del pie le boute le quor li ad creue
 En la quisine sen est colcher ale
 Andous les vs ad desur li ferme
 Vn des morz ad a sun chef turne
 Desuz les costez ad sun tinel bote
 Tiel gist sur cuilte qui ne dort si suef
Beneward leue ainz que lalbe apert
 De la quisine est al paleis turne
 Munioie escrie frans cheualers muntez
 Quant nus vendrum en larchamp sur mer
 Fui serrunt sarazin & escler
 Ia puis cel hure ni purrum recourer

2900

Dient franceis lais nus lecchere estre
Mal seit lore qui li tuen cors fu ne
Vncor nad li cocs co quid que dous feiz chante
Dist Reneward ia lai io comande
Fiz sui a rei si dei auer ferte
Par la grant fei que io pleui a De
A iceste feiz se ore sus ne leuez
Iol vus frai cher a tuz comparer
Halce le fust si fert sur vn piler
Que un estage en ad par mi colpe
Tote la sale fait sur els trembler
Pur petit nel ad tut acraunte
De la pour quil vnt sunt franceis sus leue
Mil en i out qui perdirent lur solders
Lur garnement ne poent recouer
Mettent les seles as destrers seiurnez
Granz .xv. liuues sunt de nuit ale
Nuit fu oscure nent del iur apert
Trestuit maldient Reneward al tinel
Maldit seit il des saintes miracles Dev
Cest lecheur cest paltoner pruee
Qui a tel hure nus fait ici errer
Ben granz colees li deureit lum doner
& dist Willame laissez le tut ester
Sil est fols nel vus chet a gaber

Ni ad nul si fier ne si ose
 Sil i tent sun dei ne seit mort v tue
Willame en ad lost de france mene
 Tresque il vindrent en larchamp enz le pre
 Co dist quons Boeues de cormarchiz sun frere
 & Neemeri de nerbune sun pere
 Francs cheualers de nostre cuntree
 Bien est de guere qui tost est finee
 Dient franceis pur lalmes a noz peres
 Tant i ferum de lances & des espees
 Apres noz morz en ert france dotee
 A icel mot fu Munioie escriee
 Lenseigne Charles de france lempere
 Beissent les lances as paiens se iusterent
Willame en ad lost de france mene
 Tresque il uindrent en larchamp sur mer
 & quil virent les barges & les nies
 Seignurs baruns dist Willame al curbnies
 Ore aum tant espleite & alesz
 Que nus ueum sarazins & esclers
 Car lur alum chalenger & mustrer
 Qui a tort honissent sainte crestiente
 Qui ore me uoldrad felonie mustrer
 En bataille en larchamp sur mer
 Congie de Dev & de mei li uoil doner

2950

Quen dulce france sen poent retourner
 Quant cil loirent si vnt Dev merciez
 Tuz les cowarz sunt une part turnez
 Mult est creue sa force & sun barne
 En dulce france se uoldrunt retourner
 Vont a Willame le cunge demander
 & il lur dune ne lur deignad veer
 Mais ne qui mie quil algent ai tiel
 Car Reneward les encuntre a un gue
 A un destreit v il deueient passer
 En sun col portat sun grant tinel
 Seignurs dist il v deuez vus aler
 Li quons Willame nus ad cungie done
 Car ten reuien Reneward al tinel
 Vez tanz en i ad sarazins & esclers
 Ia pe de noz nen uerrez eschaper
 Dist Reneward lecchurs vus i mentez
 Mar i entrastes par la fei que dei Dev
 Dunc lur curt sure si ad le talent mue
 Plus de quatoze en ad al fust tue
 Trestuz les fist par force retorner
 Vint a Willame sil ad araisune
 Sire Willame un petit matendez
 Ices couarz que vus ici ueez
 Ceste est ma torche mun pople & mun barnez 2975

& mei & els en la pointe metez
 Contre les lances aguz des esclers
 Si ferai io dist Willame li bers
 Si Dev mait i nert mes tresturne
 Ices cowarz dunt vus moez parler
 Puis furent cels en larchamp cum bers
 Grant mester eurent a Willame al curbnies
Mult i feri ben Willame al curbnies
 Quant Dev de glorie enluminad le barne
 & li quons Boeue de comarchis le ber
 & Naimeris & Ernard li barbez
 & Reneward qui portad le tinel
 Al primer chef en ad treis cenx tuez
 & tute iur durad lestur mortel
 & tote nuit en ad lenchalz dure
 Tresqual demain que li ior aparut cler
 Par mi larchamp corut un doit de sanc tel
 Ben en peust un grant coissel turner
 Reneward ad vers midi garde
 Vit le soleil mult haltement leue
 Que est co diable ferum nus ia mais el
 Que sarazins ocire & afronter
 Ben en i at mais treis itanz i pert
 Si io fusse a loun la cite
 En la cuisine v io soleie conuerser

3000

A cest hure me fuisse io dignez
Del bon vin cler eusse beu assez
Si men dormisse iuste le fev suef
Co comparunt sarazin & escler
Sire Willame ci vus pri que matendez
& io irrai la ius vers cele mer
La v uei les dromunz a ancrer
Sis irrai freindre & bruser ces nes
Car quant lestur serrad vencu champel
Enz as nies enterunt sarazin & escler
Si senfuirunt as undes de halte mer
Par Dev celestre puis ni poum recourer
Dient franceis mult est Reneward ber
Beneit seit lore que le suen cors fu ne
Pas auant altre i prent a deualer
Deuant li garde si veit un rei errer
Nez fud de cordres si out a nun Ailred
& cheualchout un destrer abriued
& Reneward le feri del tinel
Tut le bruse mort lad acraunte
& le cheual li ad par mi colpe
Enz en la nef al fort rei Ailre
Iloec trouad set cent paiens armez
Tuz les ad morz ocis & agrauntez
Li quons Bertram i ert enprisonez

Quant il le ueit sil prent a esgarder
Cheualer sire co dist Bertram le ber
Fiz a barun qui cest bastun tenez
Beneit seit le hure que uostre cors fu ne
Es tu de paenisme v de crestiente
Dist Reneward io crei tresbien en De
Cum as tu nun gard nel me celer
Io ai nun Bertram nies Willame al curbneis
Dist Reneward lui conuis io assez
Il mamenad ci de loun la cite
De la quisine v io ai conuerse
Reneward sire car me desprisonez
Li quons Willame vus en saura bon grez
Dist Reneward vn petit matendez
Quant paiens uei as fonz de celes niefs
Qui suz ces deies se mucent pur mun tinel
Od mun bastun les irrai afronter
Pas auant altre comence a deualer
Il les consiut sur le bord de la nef
A un sul colp ad tuz esrenes
Puis vint al cunte sil ad desprisonez
Les granz seius li ad del col gete
Si lenporta a la frecche herbe al pre
Li quons Bertram len ad araisone
Reneward sire tu mas deprisone

3050

Ore vus pri pur Dev que des altres pensez
Ail dunc mais dist Reneward le ber
Oil veirs quatre que mult deuez amer
Walter de termes & Reiner le sene
& Guilin & Guischard al vis cler
Bertram sire sez tu ben gouverner
Oil aiui io en soi ia dis assez
Cest dromund peise nel purrum remuer
Menescient se set cent i eust assemblez
Dist Reneward un petit matendez
Ia del trop lent ne dirrat hom buntez
Ne de malueisted nert ia bon los chantez
Enz al grauer ad sun bastun fichez
Del liu lenpeint tote la fait trembler
Pur un petit ne fait le bord voler
& Bertram est al gouvernail ale
Païen les veient ne lur vint pas a gre
Lancent lur lances & peres & aguez pels
Reneward sest a els acosteiez
Dunc ioinst ses pez si sailli en lur nes
Dunc les acuilt Reneward a sun tinel
Trestuz les ad morz & acrauentez
Treis mille saillent de pour en la mer
Dist Reneward ore est vus mal ale
Mielz vus uenist morir od mun tinel

Que si neer as vndes de halte mer
Fiz a puteins malueis martire auez
Puis vint as cuntes sis ad deprisonez
Li quons Bertram len ad araisone
Reneward sire vus mauez deprisone
& tuz ces altres dunt vus face Dev grez
Ore vus pri que de cheuals pensez
De bones armes dunt fuissum adobez
Puis uerriez cum nus sauum iuer
Dist Reneward vus en auez asez
Tant en vei io as sarizins mener
Deuant lui garde si ueit un rei errer
& cheualche vn destrer soiurne
& il li donad al front de sun tinel
Tut le bruse que mort lad acraunte
& le cheual li ad par mi colpe
Dist Bertram cest colp est mal ale
De cest cheual nerc mes adube
Dist Reneward un petit matendez
Del altre part garde ueit le rei Ouerter
& Reneward le fiert si del tinel
Tut le debruse mort lad acraunte
& le cheual li ad par mi colpe
Se si vus uient io nerc hui mes adube
Issi en poez quatre mil tuer

Dist Reneward de folie parlez
 Cest fust peise nel puis mie gouverner
 Grosse est la brace qui me tient al coste
 Puis que io lai contre munt leue
 Par nul semblant nel puis a dominer
 Ne petit colp ne puis io pas doner
 Co dist Bertram altre conseil en prenez
 Bels sire bor fuisse vus nez
 Co dist Bertram ia ne verrez vus tel
 Ke en botant nel poez tuer
 Dist Reneward vus dites uerite
 Mei fei ne men ere pense
 Deuant lui garde vit le rei Corduel
 & cheualcholt un destrer abriue
 Dunc li curt sure Reneward al tinel
 Bute le al piz sil ad tut debruse
 Par la boche li salt le sanc & par le nies
 Plus tost nen est li paiens ius ale
 & Bertram est al alferant munte
 & les autres cuntes ad li ben adobez
 De bones armes & de destrers soiurnez
 Li quons Bertram len ad araisonez
 Reneward sire tu nus as desprisonez
 Pur Dev vus pri Willame nus mostrez
 Dist Reneward ben vus sai guier

Sire Bertram iuste mei vus tenez
 I dunc prent si granz colps a doner
 Auant ses poinz ne pot nuls eschaper
 Par la bataille dunt vus me oez parler
 Feseit tele rute Reneward a sun tinel
 Ben se peussent quatre chars entre cuntrier
Bertram laist cure lalferant
 Il ne fu unc laner ne couard
 Si vait ferir un paie Malagant
 Lescu li freinst & le halberc li estroad
 Pleine sa hanste labat mort del cheual
 Co dist Bertram vus me ueistes ia
 Ben vus conuis a la chere & as dras
 En la nef me feistes maint mals
En sum un pui vnt Willame troue
 Bertram lad baise & acole
 Dunc li demande Willame al curbnies
 Bels nies Bertram qui vus ad desprisonez
 A nun Dev vncle dist il vn cheualer
 Vn fort un fier vn ioefne un alosez
 Bone fud lore que le suen cors fud ne
 Plus de treis mil lur en ad a mort iete
 & debruse lur barges & lur nef
 Deus dist Willame tant le deusse amer
 Se a nul saueir le ueisse a turner

Lunsdi al vespre
Ore sentre baisent Bertram & Willame
& Guielin & dan Walter de termes
& Guischard & Girard fiz Cadele
Grant est la ioie del parente Willame
Este vus errant Gloriant de palerne
Vn sarazin felun de pute geste
Crestiens muet a doel & a perte
& Reneward le fiert si en le healme
En quatre lius li ad bruse la teste
De quinze parz li espaut la ceruele
Co dist Willame tu deis ben cheualer estre
Fel seie io si io ne te doins terre
& moiller gente qui ert de bons ancestres
Aincui uerrum al chef & en la cue
Quele est la geste Naimeri de nerbune
Upc ni vit vn en terre ne en crutes
Ainz sunt oscis a gransz batailles doubles
Este vus errant Tabur de canaloine
Vn sarazin qui Dampnedev confunde
Gros out le cors & leschine curbe
Lunges les denz si est uelu cum vrse
Ne porte arme for le bec & les vngles
Veit Guielin si li est coru sure
Baie la gule si li quidad tranglutre

3175

r

Tut ensement cum une meure pome
 & cil le fer del espee en la loigne
 Ia leust mort quant sa hanste li fruisse
 Ia le socurad Willame le pruuз cunte
 De sun espe le fiert par angoisse
 En treis meitez la hanste li fruisse
 Le quir fud dur ne volt entamer vnques
 Il traist sespee & Willame la sue
 Fierent & caplent & cil baie la gule
 Les branz dascer mangue & runge
 Od les denz granz que Dampnedev confunde
 Quidad Willame del tut confondre
 Plus ad dur le quir que healme ne broine
 Ia ne murrad darne pur mil home
 Si Reneward od le tinel nel afronte
 Reneward vint corant par mi vn cumbe
 Veit le païen si li est coru sure
 & cil a lui qui nel mes choisit vnques
 Baie la gule car il le quidad transglutre
 & cil le fiert del tinel enz el sume
 Noef colps i feri & al disme en vait vltre
 Cil huche & brait que quatre liwes lunges
 Poeit hom oir de celui dunques
 Quant lunt entendu li païen & li hungre
 Mult lur est laiz quant Thabur veient confondre 3200

Quant Willame veit chair laduerser
 Ses mains dresce contremunt vers le ciel
 & dist Reneward beneit seit tun chef
 Deus te defende de mort & dencombrer
 Ne munte a rien lance ne espe
 Mielz ualt cest fust que nul arme suz ciel
A icel colp fuissent paiens uencuz
 Quant lamirail de balan i est uenuz
 Ne porte arme fors un flael de fust
 De quatre quirs de cerf tut enuols fu
 Caple & caplers dunt le tienent adesus
 Le flael fud dun grant iarit fenduz
 De noz franceis fait un caple si durs
 Plus en ocist que mangonel de fust
 Ne set peres ne oceissent plus
 Quant le veit Huges vnc tant dolent ne fu
 Lauferant broche qui li curt de uertv
 De sun espe lad al piz feru
 En bise roche en peust faire plus
 Cil ad dresce sun flael cuntre lui
 Tut en trauers li trenchad sun escv
 Sun cheual li ad tue suz lui
 Cil laist lestur ne pout mais senfui
 Allas dist il le fiz Bertram mar fui
 Cosin Willame le ber de munt loun

Quant vn païen mad hui el champ uencv
 Franceis escrient Finement est venv
 V Antecrist v Bagot v Tartarun
 V denfern le ueillard Belzebun
 & Reneward al tinel v est tu
 Se ore ne uiens tuz crestiens aum perdv
 A itant est Reneward auale dun piu
 V dous reis mult forz se sunt combatv
 Al rei Mathanar & al rei Feragu
 Mais merci Dev il les out ben venv
 Sun bon tinel trestut sanglant en fu
 Vit le Willame vnc tant le ne fu
 Bel sire io vus quidowe auer perdu
 Veez la bataille vnques tele ne fu
 Vn vif diable ad vn flael de fust
 Dunt nus ocist tuz & defait & destruit
 Dist Reneward baillez me set escuz
 & set halbercs ad en sun dos vestuz
 & en sun chef ad mis set healmes aguz
 Prent sun tinel si vait encontre lui
Quant le païen le veit si aprusce
 En sun latin ad raisun comence
 Coment diable es tu dunc crestien
 Qui a tun col portes si fait bastun
 Tels ne portat mais nuls hom de suz ciel

3250

Dist Reneward io sui ben baptizez
Se Mahomet ne uolez reneier
& Appolin & Teruagant le veil
Aincui uerrez qui li nostre Dev ert
Il li curt sure a lei de cheualer
De bon tinel li mist par mi le chef
En mi le frunt iuste le surciller
Que li brusat ben plus que demi pe
Mal ait le quart que unc le sent laduerser
Sa grant vertu ne uolt a febleier
Sun fer talent vnc ne deignad changer
Ainz ad turne sun flael contre lui
Tut en trauers li trenchad sis escuz
Des set quil porte ne li lait mais vn
Cil salt a riere quinze pez par uertv
Sil le conseust en char tut leust confundv
Reneward fud mult prouz & sene
Al tur franceis lores si est turne
Al Haterel de tries li dunad vn colp tel
Que andous les oilz li fist del chef uoler
Mort le trebuche ueant tut le barne
Este vus poignant vn fort rei Aildre
Celui fud vncle Reneward al tinel
Vn mail de fer ad en sun col leue
Quatre cenx franceis nus ad afronte

Auant ses poinz ne puet vn eschaper
Si vait querant Willame al curbnies
& Reneward sest a lui acostez
Sire dist il a mei vus combatez
Diua lecchere car me laissez ester
A itel glotun nai io soig de parler
Mais mustrez mei Willame al curbnies
Sil aurai io od cest mail afrontez
Dist Reneward de folie parlez
Des hui matin lunt paiens mort getez
Veez le la v il gist en cel pre
A cel vert healme a cel escv bocle
Fiz a putein dis me tu dunc verite
Pur sue amur tauerai mort gete
& Reneward est auant passe
Encontremunt en ad leue le tinel
& lamurafle en ad le mail leue
Reneward le fiert sur le chef del tinel
Fort fu le healme v le brun ascer luist cler
Encontremunt sen surt le tinel
Dist Reneward ore sui mal vergunde
Si mierz ni fert perdu ai ma bunte
Dunc se coruce Reneward al tinel
Par grant uertu li fait un colp ferir
Tut le combruse mort lad acraunte

& le cheual li ad par mi colpe
 Vne grant teise en fert le bastun al pre
 En treis meitez est bruse le tinel
 Qui donast a paiens tote crestiente
 & paenisme & de long & de le
 Ne fuissent els si ioianz co poez sauer
 Sure li corent cum chens afamez
 Tuz le uolent oscire & demenbrer
 Dunc se rebrace Reneward cume ber
 Il nen out lance ne espe adube
 Les poinz que ad gros lur prent a presenter
 Quil fiert al dos sempres li ad esredne
 & qui al piz le quor li ad creue
 & qui al chef les oilz li fait uoler
 Dient paiens or i sunt vifs malfez
 Ore est il pire quil ne fu al tinel
 A uif diables le puissum comander
 Ia nert vencv pur nul home qui seit ne
 Dunc alasquid le nov de sun baldre
 Si ad le punt del espee troue
 Que li chargeat Guiburc od le vis cler
 Traite lad de forere si li vint mult a gre
 De deuant lui garde si vit le rei Fore
 A munt el le healme li ad un colp presente
 Tut le purfent iusqual nov del baldre

& le cheual li ad par mi colpe
 De si qual helt fiert le brant enz al pre
 Dist Reneward merueilles vei par Dev
 De si petit arme que si trenche suef
 Beneit seit lalme qui le me ceinst al le
 Chascun franc home deueit quatre porter
 Si lune freinst quil puisse recourer
Dient paien mult fames grant folie
 Ke cest diable nus laissum ci oscire
 Fuium nus ent en mer en cel abisme
 La v noz barges sunt rengees & mises
 Mais Reneward les ad si departies
 Ni ad une sule entere sis ad malmises
 Fuient paiens Reneward ne fine de oscire
 Ainz quil senturnent lur ad mort dous mile
 Cil senfuient si que un sul ne remeint mie
Ore vnt franceis lestur esuigure
 Kil ne trouent sarazin ne eschler
 Grant est leschec quil vnt conquiste
 Nerent mes pources en trestut lur ee
 Sonent lur greilles si sen sunt tresturne
 Dreit a orenge le mirable cite
 Escrient leve asseent al digner
 As esquiers funt la preie garder
 Pur folie i fud Reneward oblie

A quel que seit lestouerad comparer
Si cum il durent la preie retourner
Si se clamad chaitif maleure
Allas dolent cum mar fui unques nee
Cum mar fu fiz al fort rei Derame
& Oriabel ma mere de ultre la mer
Io ne fu unques baptize ne leue
Nen muster nentrai pur preer De
Io ai uencu le fort estur champel
Li quons Willame me tient en tiel vilte
Que a sun manger ne me uolt apeler
Ore men irrai en espaigne le regne
Si irrai Mahomet servir & aorer
Si iol voil faire rei serra corone
Meie ert la terre tresquen durester
De babiloine desque duraz sur mer
En sum mun col aurai un grant tinel
Ne plus altre arme un dener monee
Al pais uendrai deuant ceste cite
Si ferai dunc de crestiens altre tel
Cum ore ai fait de paiens de ultre mer
Seignurs fait il esquiers & bachelers
A Dampnedeu vus puisse comander
Io men irrai en estrange regne
& vus irrez a la bone cite

3375

s

Defiez mei Willame al curbnies
Pur Dev vus pri Guiburc me saluez
Suz ciel nad rien que io dei tant amer
& cil li responent si cum vus comandez
Les esquiers sunt a oreng alez
Sire Willame le marchiz al curbnies
Le fort senvait que ferit del tinel
A dist Willame leccheres vus me gabez
Nufaimes sire ainz ainz vus dium ueritez
Tresquen espaigne nert mais returnez
Il ne fud vnques baptizez ne leuez
Nen muster nentrait pur orer Deus
Sil le uolt faire rei serrad coronez
Sue ert la terre tresquen durester
De babiloine tresque duraz sur mer
Puis reuendrad deuant ceste cite
A cent mil homes sis uolt assembler
& sur son col aurad un grant tinel
Si ferad de crestiens tut altre tel
Cum ad fait de paiens de ultre mer
Co dist Willame co fait mult a doter
Qui le me irreit hucher & apeler
Io li durreie grantment de mun auer
& qui ca le freit a mei retourner
Grant partie li durreie de tute me herite 3400

Seignurs francs baruns car i alez
 Volenters sire quant vus le comandez
 Quatre mile se corent adober
 De halbercs & de healmes & es destrers sunt muntez
 Mais Reneward aconsiuerent en un pre
 Cum il deueit en vne uile entrer
 Quant il les ueit si faitement errer
 Ne solt que faire ne ne solt que penser
 Deuant li garde vit un bordel ester
 Passad auant si enracad les pels
 & totes les furches en ad acrauentes
 En sun col en ad le fest leue
 Cuntre franceis est el champ turne
 Seignurs dist il v deuez vus aler
 Willame vus mande que vus enuenez
 De sun tort fait vus ert gage donez
 & del manger dunt vus fustes obliez
 Dist Reneward vnc mais noi tel
 Qui enprendrat gage el col ait il mal de he
 Tresquen verrai morir des suens & pasmer
 Floec auait un cheualer felun
 Nun out Gumbald frere a Lealme de clermunt
 A lei de fol comencad sa raisun
 A Dev lecchere nus vus en remerrum
 Al quons Willame en la tur vus rendrum

Vus me ocistes Winebold mun nevov
 A la cusine vus ueillad laltre iur
 Mais par la fei que dei saint Simeon
 Si me nesteit pur ma dame dame Guiburc
 Io vus ferreie de ma lance al polmun
 Dist Reneward ore oi parler bricun
 Mar le parlastes si Dev ioie me doinst
 Halce le fust sure li est coru
 Sil fert el chef altresi brait cume lov
 Les oilz li uolent la ceruele li est expandv
Lunsdi al uestre
 Dist Reneward recev auez pusteles
 Ne sai des autres mais vus morst la feste
 Franceis senturnent le pendant dun tertre
 Moerent cheuals & lur lances i perdent
Reneward tent le grant fest de cele bordel
 En halt le porte & en bas le fait aualer
 Quil consiut en sum le chef li crote
 Li quons Willame esteit lez une porte
 Lui & Guiburc si se beisent & acolent
 Co dist Willame io uei uenir li nostre
 Menescientre Reneward les afole
Lunsdi al uestre
 Dient franceis mar i alames certes
 A uif diable qui porte une feste

Cent en ad mort sanz confessiun de prestre
Ore irrai io co dist li quons Willame
Oue ke lui ameine la raine conuerte
& Guielin & dan Walter de termes
& Guischarde & Girard fiz Cadele
& treis cenx frans sanz halbercs & sanz healmes
Mais Reneward trouent sur vn tertre
Dame Guiburc primer len apele
Sire Reneward pur les oilz de ta teste
Car pren dreit de mun seignur Willame
Volenters dame par ceste meie destre
Si mei nesteit pur Guiburc la bele
Iol ferreie ia al chef de ceste feste
Danduis parz en charreit la ceruele
Ore vus pardoins la felonie pesme
Del manger dunt vus me obliastes
Dient franceis metez dunc ius cele feste
& dist Reneward uolenters par ma teste
Dunc la ruad quatoze arpenz de terre
A treis cent franceis par desure lur testes
Mult sunt ioius quant il guerpi la feste
Tels cent en i out qui la feure enporterent
Ore sunt Willame & Reneward assemblez
Par grant amur se sunt entre acordez
Il en alerent a la cite de orenge

Poez sauer que a manger eurent sempres
& lewe li tint le paleim Bertram
Guiburc li aportad la tualie deuant
Galter de termes le sert a sun talant
Quant Reneward ad mange a plente
Dame Guiburc le prent a parler
Reneward sire par sainte charite
Fustes vus unques baptize ne leue
Nai io fait il par la fei que dei De
Vnc en muster nentrai pur preer De
Co dist Willame io te ferai leuer
Si te durrai sainte crestiente
Dist Reneward multes merciz de De
Il le menerent al muster saint Omer
Vne grant cuue i vnt fait apporter
Ben i puissent quatre vileins baigner
Willame le tint & Guiburc sa moiller
Li quons Bertram le tint mult uolenters
De dulce france la flur & le miez
Poez saueir les duns furent mult chers
La li donerent mil liures de dedeners
& od les mil liures cent muls & cent destrers
Willame li donad set chastels en fez
& Ermentrud li dunent a moiller
& tote la tere Viuien le ber

3500

Dame Guiburc len apelad primer
 Dame Guiburc len ad primes apele
 Reneward sire pur sainte charite
 Cum faitement issis de tun regne
 Dame dist il or en orrez verite
 Dame dist il io uus dirrai lealment
 Mun pere ert ale a meliant
 En semble od lui lalmacur de durant
 Si me comendat a mun meistre Apolicant
 Cil sen alad par sum lalbe apparisant
 Si me vead que ne meusse uiant
 Tresque il uendreit de aurer Teruagant
 Io ne uoleie faire pur lui tant ne quant
 Ainz men turnai tost & ignelemant
 Solunc la riue ma pelotte culant
 Iloec trouai & nef & chaland
 En unesnecke entrai par mun boban
 Dunc vint vn uent merueillus & bruant
 Par mi la mer me menad ignelmant
 Iloec trouai une fule de marchanz
 Si hurta ma esnecke a lur chalan
 Si depecat en peces plus de cen
 Sempres i neiasse si ne me fuissent aidanz
 En vne barge me traistrent quatre par les mains
 Si me menerent en une terre grant

Si mistrent sur mun chef vn raim estant
Si me clamerent chaitif venal enfant
Vnques ni out ne tieis ne romant
Ne aleman ne bretun ne normant
Qui me peust achater a lur talant
Quant par la feire vint li reis cheualchant
Il me esgardeit si me vit bel enfant
Si me achatad mil liures de besanz
Fist me leuer sur un mul amblant
Puis me menad a paris lealment
Demandat mei si ere de halte gent
& io li dis ne li celai nient
Que ere fiz Derame & ma mere Oriabel
Quant il oi que io ere de halte gent
Si suz crieust mun pere & mes parenz
Si me comandat a sun cv iaceram
& iurad Deu Pere omnipotent
Mieldre mester nauereie a mun viuant
En la quisine ai io este set anz
Freit i oi io mais unques ni oi faim
Tant que Willame me menad en larchamp
La li ai mort trente de mes parenz
Guiburc loi si passad auant
Baisez mei frere ta soror sui naissant
Lunsdi al uespre

3550

Estes vus dunc mun soruge Willame
Se iol seusse en larchamp
Bien vus ualui mais plus vus eusse este aidant. 3553

t

Note.—The unknown “Chanson de Geste” here transcribed belongs to the cycle of William of Orange. There has been no attempt to edit the text, or even to correct not a few very obvious minor errors. The two reproductions are of the same size as the original manuscript. Two hundred copies are printed at the Chiswick Press, June, 1903.

89091093658



b89091093658a

89091093658



B89091093658A